

2 SAMUEL

Jawen unanmati janchaki

Na jabias miyui chichia xanen ibujaida ja dukun Diosun Saúl katumani ma mawaken januxun David xanen ibujaidai taekainkin jaska pepa inun chakabuwakubaini jakidi kenepaunibuki, ja año 900 Cristo judiamatianan.

Saúl ma mawashina Davidin bana ninkanikiaki, na janchadan

1 ¹ Saúl Filisteo nawabube detenamei kashian mawaken janua David jadi Amalec nawabube detenamekin jatu maematan jawen detenamenikabube mae betsa Siclag anu chintuntani janu juindukuin uxa dabe jiweyuabun ² xaba dabe inun bestitian Saúlun detenamenikabun tadi jiwe puntebaunabu anua juni betsa jawen tadi buax buaxpa jawen buxka mai jasjaida Siclag anu jui David bebun jikitan jaki datei danti iki maiki beti ikaya ³ Davidin yukakin:

—¿Min jadakidia juai?— aka

kemakin yuikin:

—Israelin enabu Filisteo nawabube detenameibu anua junei paxakidanshina en juai— aka

⁴ jui kushipawen Davidin yukakin:

—Jawa jaskashinabumenkain, menan ea yuidiwe— aka

kemakin yuikin:

—Detenamenikabu jatidi paxaibun jakia Israelin enabu ichapadi mawadiashinabuki. Jabu bestimadan, xanen ibu Saúl inun jawen bake Jonatán dikabi tenandiashinabuki— aka

⁵ ja juni jatun kaka bexuan Davidin ana yukakin:

—¿Saúl inun jawen bake Jonatán mawai jaskatan ishian min unain?— aka

⁶ ja junin kemakin yuikin:

—Mati Guilboa anu kaxun Saúl jin iki jawen jashiwen mestean nia Filisteo nawabu jatun caballo katsaumea beaibu en uianyan

⁷ nasaukekauan Saúlun ea uintan ea kena: “En mia ninkai ea yuiwe”, ea

aka, ⁸“¿Min tsuamen?” ea aka, kemakin: “En Amalec nawaki”, en wa ⁹ea yuikin: “Ea dapi juwe. En shinan paxabia en isin tenechakayamaiwen taexun ea medabewakin menan jawaida ea tenandiwe”, akin ea yunua ¹⁰tin ika daka ana jaska benitan jiwetiduma uinkin en tenanshinaki.

Jaska watan ja xanen ibun oro maiti sawea mabixun jawen mebi metsekin mesiditan min nukun xanen ibuken en mia bexunxuki— aka

¹¹jatu jaska yuia ninkatan David inun jabe mapuabu punu nukai keyutan jatun tadi ushniakeakebauntan ¹²Saúl inun jawen bake Jonatán ma mawashinabu inun Israelin enabun Jehová detenaxunmisbu Filisteo nawabun ma jatu detekin maemakin keyushinabuwen taea jatuya kaxai bis bis ikubaini badi chai tanai piama samakeaibun ¹³ma badi kaken kaxai neseabun ja bedunan jatun kaka bekin banabimaxu ana kenaxun Davidin yukakin:

—¿Miadan, min janiamen?— aka kemakin yuikin:

—En nawa betsaki, Amalec nawa minabube jiweatun bakedan— aka ¹⁴januxun jancha kushipawen Davidin yuikin:

—Xanen ibu wakin Jehován katuni dateama ¿jaskakin min nukun xanen ibujaida deteshinamen?— atan

¹⁵⁻¹⁶jawen tsuma betsa kenaxun yunukin:

—Iyxun tenanwen— iwanan, jatu tenanmadiama ja juni Davidin ana yuikin: —Xanen ibu Jehován katuni min tenanshinadan, ibubis min nukuki chanixuwen taea min mawaidan, minaki— akaya

Davidin tsumapan ja Amalec nawa detekin tenanikiaki.

**Saúl inun Jonatán mawashinabu shinain jatu manui
David jatukidi kantanikiaki, na janchadan**

¹⁷Saúl inun Jonatán mawashinabu shinain nui David kantai ¹⁸Israelin juni bake Judán enabu dasibi jau jadi jatu jaska yusinkubainxanunbun Davidin jatu yunua na jabias kanta kene jawen una Justo anu kenenibukiaki. ¹⁹“David nui kantakin ani en matu yuiyai ninkakanwen:

¡Peidawa! Israelin enabuun,

matun manan mati matipa anua

matun mentsisipa kushipabu man jawen kenmis ma mawabuki.

Matun detenamenikabu kushipabu ma debuabuki.

²⁰Gat anu kaxun jatu banabimayamakanwen.

Ja dikabi Ascalón bai tanabainkin jatu yuidiakubainyamakanwen, jau Filisteo nawa ainbuaibu Dios ikunwanbuman jaska kaka ninkatan

benimai jau ishchu ishchu iyamanunbunan.

²¹Guilboa mati matipaan,

janua detenamenika kushipabun mabu pema pema ashianbu inun

- Saúlun nemati mane chapui jawen chaxa ma pui ichai keyuaiwen taea
 jau min mai anu ui inun bishi nibi miki ana nidi iyamaxanunwen.
- 22 Saúl inun jawen bake Jonatán jatuki sinataibube detenametani chintunbidankin
 jatun pia inun jatun machatu chaipa mentsisipabu
 jawen jatu deteshina jatun jimi inun jatun xeni iduma bei
 chintunbidankin mekubidanmisbu
 ana jaskatan jaska watidubumajaidaki.
- 23 Saúl inun Jonatáneen, matu bechipaikin matukidi pe
 shinanmisbudan,
 man jiweshina inun man ma mawabiashina tsuan matu dabe
 paxkatidubumaki.
 Tete jawaida nuyakainmis inun
 leónen kushipa man jatu binuaki.
- 24 Israel ainbuaibuun,
 tadi tunanepa inun tadi manyunepa Saúlun matu sawemakubainkin
 tadi betsa oro yumenyan matu dauwamashinawen taea
 Saúl shinain jaya kaxakubainkanwen.
- 25 Jaskatan detenamenika mentsisipabu kushipabia detenameti bai
 anua debui nidi ishianbudan,
 matun mati keyatapa anua Jonatán mawadiashinaki.
- 26 Jonatáneen, min en betsa keskawen taea
 mia manui en juinti en nishmajaidaki.
 Jawadawen bepadankin ea juneama min ea duawakubainkin
 ainbuaibun ea bechipaiaibu jatu binukin pepawakin
 min ea jaibujaida wakubainshinaki.
- 27 ¡Pemajaidaki! Detenamenikabu kushipabu jatu tenankin nidi akin
 jatun detenameti mabu jatu yamawashinabuki”,
 iki kaxawen kantai David jaskanikiaki.

**Judán enabu anu jau David jatu xanen
 ibukunkainxanun katunibukiaki, na janchadan**

- 2** ¹Saúl inun Jonatán mawashinabuwen David nui kantakin jatu
 kenemashina chipu Davidin Jehová yukakin:
 —¿Judán enabun mai pakea anu mae betsa anu jiwei katanpa?— aka
 kemakin Jehován yuikin:
 —Jaa. Mapekekaini jadi katanwen— aka
 jaska wa tapinun, iwanan, Davidin ana yukakin:
 —¿Jadatu maekidi katanpa?— aka
 kemakin Jehován ana yuikin:
 —Hebrónkidi katanwen— aka

²Jadi kakin jawen ain dabe iyuiкин jawen ain betsa mae betsa Jezreel anua jawen kena Ahinóam inun betsa Abigail, Carmel anua jawen bene ja dukuntun ainwani Nabal mawaken Davidin ainwanidan, ja dabe jatu iyui Hebrónkidi bai tanabaini kakin ³ja dikabi jabe mapumisbu jabudi jawenabuya Davidin jatu iyui Hebrón dapi mae betsa betsapa anu jiwei buima jiwepaunibukiaki. ⁴Janua Judán enabu juni ichapa inun jatun anibu unanepabu bui jikixun Jehovábe yubakatan David Judán enabun jatun xanen ibu wanibukiaki. Januxun jaska watan janubi jakidi chanikin junibu mae Jabés Galaad mai pakea anu jiweabu buxun Saúlun yuda bitanxun maiwaimabu David banabimabu ⁵ninkatan benimakin jancha bumisbu Davidin yunukin: “Eska jancha ea jatu yuixuntanwen: ‘Matun xanen ibu Saúl duawakin jawen yuda pewakin man maiwaimawen taexun jau Jehován jawen pepawen matu duawakubainxanunwen. ⁶Ja dikabi jakimama jau Jehován matu duawai jawen pepawen matuwen nuikin matu medabewakubainxanunwen. Jaska man Saúl medabewaima keskadi wakin ja shinankin entsedi en matu duawakubainxanaii. ⁷Natian matun xanen ibu Saúl ma mawabiashinken ana jas shinanma benimai kushipakanwen. Eadi en matun xanen ibu ikunkainxanun Judán enabun ea katushinabuki’ ”, akin jatu jancha bumanikiaki.

Hebrón anuxun Davidin juni bake ichapa bawanikiaki, na janchadan
(1 Cr 3.1-4)

3 ²Hebrón anu jiwexun Davidin juni bake ichapa wanidan, jawen juni bake ja dukun Amnón inikiaki, jawen ewa Ahinóam jawen mae Jezreel anuadan. ³Jawen juni bake ja segundo Quilab inikiaki. Jawen ewa Abigail jawen mae Carmel anua jawen bene xenidan, Nabal mawanikiaki. Jawen juni bake ja tercerodan, Absalón inikiaki, jawen ewa Maacádan. Maacádan, jawen epa Talmai mae betsa Guesur anu xanen ibun bake inikiaki. ⁴Jawen juni bake ja cuartodan, Adonías inikiaki, jawen ewan kena Haguítan. Jawen juni bake ja quintodan, Sefatías inikiaki, jawen ewan kena Abitaldan. ⁵Jawen juni bake ja sextodan, Iream inikiaki, jawen ewan kena Egládan. Hebrón anu jiwexun Davidin juni bake wadan, jati kainxunikiaki.

David jatu xanen ibuxunkin Israelbu xukuabu inun Judábu xukuabu
jatu yunukubainikiaki, na janchadan
(1 Cr 11.1-3)

5 ¹Hebrón anu Judán enabu David jatun xanen ibu ikaya Israelin enabu xukua tibibun anibu unanepabu Davidbe janchanun ika Hebrón anu buxun David yuikin: “Dasibi nun nukubudan, Jacob nukun

xenipabuwen taea nun jabiabuski, juni betsamadan. ²Chanima Saúl nukun xanen ibubiaken mian Israel detenamenikabu min jatu yunu pewakubainkin Filisteo nawabube min jatu detenamemakubainimaki. Ja inun, xanen ibukin Israelin enabu dasibi min yunukubainxanun katukin Jehován mia yubanikiaki. Jaskawen taea nukun xanen ibu idiakunkainxanwen”, akeakeabu,

³jaska wakin Israelin enabu anibu unanepabu dasibi buxun Hebrón anu xanen ibujaida Davidbe janchakin Jehován jau jatu unanti wakubainxanun David jatube yubakai taekin Israelin enabu dasibi David jabundi xanen ibu idiakunkainxanun anibu unanepabu dasibibun jatun xanen ibu wakin David katunibukiaki. ⁴⁻⁵Hebrón anua xanen ibui taei David 30 año jayanikiaki. Hebrón anu 7 año namakis Judán enabu anua David xanen ibukunkaini chipu Jerusalén anu maetan 33 año Israelin enabu dasibi anu David xanen ibudiakunkaini mawadiama 40 año David jatu xanen ibuxunikiaki.

**Sión mae kushipa Jerusalén Davidin jawenabubetan
jatu mebinikiaki, na janchadan
(1 Cr 11.4-9)**

⁶Israelin enabu dasibibun David xanen ibujaidawakin taewaimabu Jebuseo nawabu Jerusalén anu jiweabu inun ja dapi jiwebaunabu jatu maemanun ika Jerusalén anu xanen ibujaida David inun jawen detenamenikabu buabu jatu uinkin shinain jaskatan jatun mae anu jikitiduma dabanen David yuikin: “Miadan, jaskatan min nuku anu jikitidumaki. Nukun bekunbu inun chantubun matu jikimatidubumaki. Jaska bestiki. Nenuadan, budikanwen”, ⁷⁻⁸jatu wabiabu Davidin jawen detenamenikabu yuikin: “Jebuseo nawabu jatu detekin keyuidan, ja jene jabakainti wanibu anu dasibibu janu jiki keyubain ja Jebuseo nawabu bekunbu inun chantubu en jatu dananjaidai nuku nemaibu jatu tenain bukanwen”, jatu wa jaska jatu yuia jene jabati wakin mishkiwen buyabainibu baiwen jikibain jatu maemakin achi keyutan Davidin Sión kenebaunibu jawena wanikiaki. Ikis Jerusalén anu mananan kenebaunibu kena betsa wakin: “Davidin Maeki”, amisbuki. Ja dikabi David jadi janchaniwen taea tsuanda yuikin: “Jhován kenwanti jiwe jemaintin kenekauna anu bekunbu inun chantubu jikitibumaki”, ikin jatun beyawen yuikubainmisbuki. ⁹Ja mananan mishki kenebaunibu anu jawenabube David jiweabu jatu kenakin: “Davidin Maeki”, akaibun ana mishkiwen jatu kene nati amakatsi ikin Davidin jatu yunua nortekidi mishki kene xeni ana jatu chichimabaunkin mai inun mishki tude shadabuwen mai panpa wakubainkin tapaiti keska wakin mishki kene bena wakin janu Davidin jiwe bena ewapa jawendua jatu amaxanai anu keben nati akin dexun wabaunkin kene xeniki mexti anibukiaki.

**Nawa betsa Hiramnen jawen janchaxunikabu David anu jatu
yununikiaki, na janchadan
(1 Cr 14.1-2)**

¹⁰Jehová Dios kushipa dasibi binuatun David medabewaiwen taea xanen ibui David ana kushipai ewakunkainaya ¹¹jaskai ninkatan jawen datekin maewan betsa Tiro anua xanen ibujaida betsa jawen kena Hiramnen jawen xanen ibu bexmasbu jabu nantabu janchaxunmisbu David anu jatu yunua, ji dayamisbu inun mishki pewamisbu xanen ibu bexmasbun jatun tsumabu ji senke jatu bumaxun David jiwe jatu wamaxunkin mishki tapa ja dukun sapa wakin pewamatan januxun kuxa tuax ichapa washinxun jawen jiwe ewapa jawendua David axunkin keyutan inun buaibun ¹²jaska Jehován David xanen ibuwakin katuimaxun jawenabu Israelkidi Diosun jatu mestenwanmai inun nantakexun ninkaibu jawen xanen ibukidi kushipai Davidin ibubis unankin tapinkubainikiaki.

**Jerusalén anu maeimaxun Davidin ana bake ichapa
wanikiaki, na janchadan
(1 Cr 3.5-9; 14.3-7)**

¹³Hebrón jenebaini Jerusalén anu David jiwexun ana ainbu bikin betsa ain kayawakin inun ainbu betsa esclava betsa tibi Davidin ana bitan juni bakebu inun ainbu bakebu jatu bawanikiaki. ¹⁴Jawen juni bakebun kenadan, Samúa inun, Sobab inun, Natán inun, Salomón inun, ¹⁵Ibhar inun, Elisúa inun, Néfeg inun, Jafía inun, ¹⁶Elisumá inun, Eliadá inun, Elifélet jatibu Jerusalén anua kainibukiaki.

**Filisteo nawabu Davidin jatu maemanikiaki, na janchadan
(1 Cr 14.8-17)**

¹⁷Jau jatun xanen ibujaidanun Israelin enabu dasibitun David ma katuimabu Filisteo nawabun ninkatan jabe detenamekin maemanun ika yubakai ichabidan David benai buaibun jaskaibu ninkatan mishki kenebaunibu kushipa anu jawen detenamenikabube David jikitan juneken ¹⁸janua Filisteo nawabu bei Refaim napanpa anua detenamenun ika kebaunabun ¹⁹jaska maniabun Jehová Davidin yukakin:

—¿Filisteo nawabube detenametampa? ¿Ea medabewakin min ea jatu maemamai? Ea yuiwe— aka

Jhován kemakin yuikin:

—Jaa. Mia medabewakin en mia jatu maemamaiwen taea jatube detenametawen— aka

²⁰⁻²¹jawen detenamenikabube kai Refaim napanpa jawen kena bena Baal-perasim anu David jikixun jau jatu dete keyununbun jawenabu

jatu yunua jawaida Filisteo nawabu maemabun jatu jaska wabu jawaidabainkin jatun yushibu dami betsa betsapa Filisteo nawabun jenebainaibun jatun dami betsa betsapa ichawakin David inun jawenabun jatu bianbainibukiaki. Jawaida jatu maemaxuwen taexun Davidin yuikin: “Paxku bai matajaidabidanai chitewaxun tuea keska wakini eki sinataibu Jehová jatu ea pua axunxuki”, axun kenakin: “Baal-perasimki”, anikiaki.

²² Jakia chipu Filisteo nawabu paxatani ana chintunbidan janua detenameshinabu anu ana jabanudi Refaim napanpa anu jikitan detenamenun ika kebaunabu ²³⁻²⁴ jaskaibu uintan Jehová Davidin ana yuka kemakin Jehová yuikin:

—Ana jatu bebun buxun jatu detenun ika buyamakanwen. Jakia jatu dunkei junebaun jatun pechiudia bei muxu xukua anu jikitan man ma jaskatanaya matu mamaki kauani en banakainai ninkatan en ma matu bebuxunai unantan jawaidabain Filisteo nawabu detebaunxankanwen, en jatu matu tenanxunaidan— aka

²⁵ jawen jancha ninkatan jabias Jehová yunua Davidin akin jawen detenamenikabubetan Filisteo nawabu maemakin jatu deteabu paxaibu Gabaón anua jatu detekin chibankubainkin Guézer anu jatu jenetani chintuntanibukiaki.

Jehová jancha aduni bau Jerusalén anu Davidin maewanun ika inikiaki, na janchadan

(1 Cr 13.5-14)

6 ¹ Chipu dasibi Israelin enabu 30,000 detenamenikabu jawenabun jatu katumisbu Davidin ana jawenawakin dasiwakin jatu ichawatan ² janua mae Baalá Judán mai pakea anua David jawen detenamenikabube kaxun jawen mae Jerusalén anu Dios jatube yubakani jancha aduni bau maewakatsi inikiaki, ja bau bebunua Diosbe jawenabu janchaxunika xanen ibujaidatun jatu janchaxunmis Dios dasibi binu keyuatun kena ja querubine jamamaki tsaua yukamisbudan. ³⁻⁴ Mati anu juni betsa jawen kena Abinadabin jiwe anua Diosun jancha aduni bau Jacobun bake Levín enabun jawen tsumatiwen bitan bakebainkin ina awa dabe tadanbainti bena beabuki naneabu Abinadabin juni bake dabe Uzá inun Ahiódan, jabun ja ina awa dabe tadanbaintiki bukin Ahió bebukainkin ina awa dabe dispiwen tsumaxun ninibainaya jawen betsa Uzá chipi kakini medabewabainaya ⁵ jabiatiandi Jehová uinmakini kenwankini arpa inun, salterios inun, panderos inun, castañuelas inun, platillos tsumatan bebubainkin jui kushipawen nawai kankubaini bui ⁶ janua juni betsa jawen kena Nacónen mati napanpa janua xekiwan bimi tsekaxun katamisbu anu niti itan ina awa dabe itimaskabaunkini Diosun jancha aduni bau bedanbu tin ikai meken bestichaiwen Uzán tsumapaikin

7tsuan metidumajaida jawa shinanma Uzán metsaiwen taea Jehová jaki sinatajaidakin tenan Diosun jancha aduni bau dapi tin itan jawaida Uzá mawaya

8Jehován Uzá tenanxuwen taea David jaska bechipaiama sinatakin ja napanpa kenakin: “Peres-uzáki”, anikiaki. Na jabiatian ja kena jakimaibuma jayaki. 9Jabias xabatiandi Jehováki datechakayamakin Davidin yuikin: “¿Jaskakin jawa shinanma Jehován jancha aduni bau en bexumen?”, itan “¡Ana en jadi buamaki!” iwanan, 10Davidin jawen mae ewapa anu ana bukatsi ikama mae betsa Gat anu Obed-edomnen jiwe anu jau bununbun Davidin jatu yunua 11Obed-edomnen jiwe anu uxe dabe inun besti Jehován jancha aduni bau tsaunbidanimawen taexun Obed-edom inun jawenabus Jehován jabu besti pe mekekin medabewakubainaya

**Jerusalén anu Jehován jancha aduni bau Davidin ana jatu
bimatanikiaki, na janchadan
(1 Cr 15.1–16.6)**

12xanen ibujaida David anu kaxun jawenabun David yuitantankin: “Jehován jancha aduni bau Obed-edom anu min bashibidanimawen taexun jawen bakebube jawen jamapai Jehován duawakin medabewakubainikiki”, akin shinan betsamabu uintanun ika Obed-edomnen jiwe anu David kaxun chanima jaska wai uintan jawen mae anu Dios jatube yubakani jancha aduni bau Davidin ana bukin maewadinun ixun benimakin jatu pewamatan 134 junibun iabaini paibaini 6ki ma tatekebainaibun Davidin Jehová ja menuxunkatsi ina awa bene pepa inun chaxuwan bene xuadanwan ma pewa tesentan dashpexun jawen xeni bixun chiwen kuakin jawen kuinwen Davidin Jehová benimawabaini

14jawen efod lino tadi juxupa sawea nawai xeke xeke ichakayamakunkaini 15Israelin enabun Jehován jancha aduni bau buaibun dasibi benima chakayamai shanshanki ibainkin jatun mane trompeta chan chan ati mawakubaini buaibun

16Davidin mae mishki kenebaunibu anu Jehován jancha aduni bau iabaini jikiuibun Saúlun ainbu bake Mical ja dukun Davidin ainwani janu niwe jikiti xui anu nixun jaska Jehová bebun David xeke xeke iki nawakunkainai Micalin uintan jaska bechipaiama jawen dakekin dananchakayamaya

17Jehován jancha aduni bau iabaini bukin tadi jiwe ewapa ma jaki tanaxun Davidin jatu puntemashina namakis tsuanbu ana ja kachu Davidin jawaida jawen tsumabu yunua Jehová bebun chaxuwan ichapa tesenxun dashpe keyuxun xeni dasibi bixun jawen nami dasibi mexte mexte akin chudi waxun jawen nuewen Jehová benimawakin menukin taewaibun 18Davidin menukin keyutan Jehová kushipa dasibi binuatun

kenawen jancha pepawen jawenabu dasibi jatukidi pe janchakin Davidin jatu pepawatan ¹⁹januxun Israelin enabu dasibi janu ichabu junibu inun ainbuaibudan, xekiwan trigo misi ewapa bestichai inun, nami xui tunku bestichai inun, uva bimi tsusin tunku wabu inun, bimi betsa batapadi tsusin tunku wakin kextu wabu bestichai jau jatu inanunbun Davidin jawen tsumabu jatu yunua bestibu tibi jatu inanbaunkin keyuabu, piti keyu bitan jatun jiwe anu chintunbainaibun

²⁰jawenabusdi jancha pepawen jatukidi pe janchanun ika jawen jiwe anu David chintunkaini kaya jawen ain betsa Saúlun bake Mical inun ika kainkaini jaki nukui kaxun dakewakin yuikin:

—Israelin enabu min jatun xanen ibujaida natian min jatu pexunkidankin min dayadubun esclava ainbuaibu bebun jaskatimabiaken jatu uinmai nawai xeke xeke ikidani min pexukitsa, dakeamadan— aka

²¹kemakin Davidin yuikin:

—Chanimaki. Jehován ea uianyan kenwankin benimawai jamen ikama en nawaxuki. Jehován enabu Israelin enabudan, en jatun xanen ibu ikunkainxanun min epa danantan minabu katuama Jehován ea katuniki. Jaskawen taea ja bebunua en nawaxuki, jawa dakeamadan. ²²Enabube en besikunkainaidan, ibubis en jawama keskaki, Jehová ixuinan. Jaskaidan, en keanmaki. Min ea jaska uinkin yuiaiwen taea en babuamaki. Min ea jaska wabiaya ja jabias esclava ainbuaibukidi min ea yuixu jabiabun ea duawakubainxankanikiki— akaya

²³janua Saúlun bake Mical jawa bake bisma yuxabunikiaki.

David duawakin pepawapakexanai Jehován yubanikiaki, na janchadan
(1 Cr 17.1-27)

7 ¹Jawen jiwe jawendua pepawen David ma unanuma jiwekainkin jaki sinataibu jiwebiabaunabun Jehován David jatu nemaxunkin daewamakubaina David ana bika teneama ²David ja mesti ma pe jiwekin Diosun jancha yuixunika jawen kena Natán yuikin:

—Eadan, kuxa jiwe jawenduawen ma en jiweaki. Jakia Jehová jatube yubakani jancha aduni bau tadi jiwe pema duakabi anu tsaua jaska medan besti tsaua pema en shinaiin— aka

³Natánen kemakin yuikin:

—Jaska min shinain keska axunwen, Jehován jaskadada mikidi shinankin mia medabewaikikidan— akin yuiwanken

⁴Davidbe janchakaini kaken jabias meshu medan Natán anu Jehová juxun yuikin:

⁵—En tsuma David anu kaxun jancha wakin: “Eska Jehován mikidi ea yuikin David ea yuixunwen: ‘Ea en janu jiwexanun mian min ea kenwanti jiwe axuntidumaki, en janu jiwexanunan. ⁶Min xenipabu Egipto anua en jatu taxnimabidanaitian en jatube jiwekunkidani inun

na jabiatandi kenwanti ji jiwe amisbu keska anu en jiwekunkainsmaki. Jakia tadi jiwe pekabainkin maewatidubu anu matun xenipabu inun minabuki en nukukunkainmiski. ⁷Badi tibi min xenipabube en kakunkaini enabu Israelin enabu xanen ibu tibi en jatu katukubainaitian januxun kenwanti kuxa jiwe jau ea waxununbun en jawa jatu yunuamajaida ikunkidaniki.’

⁸Ja dikabi en ea Jehová kushipajaida dasibi binuatun jaska en mia yuai keskadi en tsuma David ea yuixuntanxanwen: ‘Enabu Israelin enabudan, min jatu yunui xanen ibukunkainxanun chaxuwan ichapa mekekubaini nanta basi bai anu nia chaxuwan chipi jachun min nia kenatan en mia katuniki. ⁹Janu min nia ketain anu en mibe kakunkaundiamiski. Jabu miki sinataibu en mia jatu tenan keyukin nemaxunkubainmiski. Xanen ibu kushipabu jiwebaunabu keska min kena dasibibu en jatu unanmakubainaii. ¹⁰⁻¹¹Ja dikabi Israelin enabu man enabudan, man jatu yunukubainxanun unanti wanika kushipa betsa betsapa matu katukubainkin jatun mai pakea betsa jatu mebintan en matu pewaxuniki. Januxun juni chakabubun matu ichakawamis inun matu bika tenemakin tsuma wamisbu jau ana jaska man jiwepauni keska jiweama unanuma man jiwunun en matu iweniki. Janua miki sinataibun mia uiainbun en mia jatu nemaxunkubainxanaai, jau mia ana bika tenemayamanunbunan. En jatu mekekubaina min bakebu jiwekubainxanaibu bebunkidi en mia tapinmaai. ¹²Anibujaidakunkaini jiwea min ma debuniken jau min xantukun Israelin enabu yununikai xanen ibuxanun ean minabu anua min baba bestichai jawen xanen ibu keyutima en mia yunuxunxanaai. ¹³Ja inun, min baken januxun ea kenwain eki nukuti templo jatun ea axunxanikiki. En jatu putama xanen ibu jenetiduma ipakexanaikidi en jatuki yubakaii. ¹⁴Min juni bake Israelin enabu xanen ibukunkainaya en jatun epa keska inun jabu en bakebu keska ikubainxankanikiki. Min baken kanekin chakabuwai pewakin en jatu bika tenemaxanaai, jatu kupikinan, jaska epa pepabun jatun bake pewamis keska wakanan. ¹⁵Kanebiaibun en pepa en jatu mebianma ixanaai, Saúl anua en pepa en mebini keskama Saúl putatan jawen xantukun en mia xanen ibu wanidan. ¹⁶En jatu mekekubainaiwen taea minabu Israelin enabu xanen ibupakexankanikiki, niti ikamadan. Ja dikabi jaska min jatu yunumis keska jeneama ikubainxankanikiki’, iwanan, David ea yuixuntanwen”— abainaya

¹⁷jabias uinkin ninkashinkin jawa kaneama dasibi Natánen David yuikin keyua ¹⁸Jehová bebunxun jancha wanun ika Dioski nukuti tadi jiwe puntea anu xanen ibujaida David jikikain yuikin: “Xanen ibuun, ea inun enabu nun jawababiaken ¿jaskadakidi ea shinankin min ea xanen ibujaida wanimen? ¹⁹Jehováan, en min tsuma anua enabu en bababu kaindiabumabiaken xanen ibukubainxanaibu bebunkidi min

ea banabimashinaki. Jehováan, min janchai keska juni betsa janchai yubakatidumaki. ²⁰Jehováan, ea min tsumakidi dasibi min ma unan keyuaiwen taexun ean en ana jawa yuitidumaki. ²¹Jaska bebunkidi min ma ea axunkin jatu ‘¡Jabaa!’ imakubainshina chanima min ea yubashina inun jaska min bechipaiai min akubainai en unaiin. ²²Jaska nuku dasibibun nun ninkamis inun nun uinmisdan, jawa mekenika Dios betsa mia binua betsa jayamaki, mia keskadan. Jaskawen taea en mekenika Jehováan, miadan, min pepajaidaki, tsuan jaska watiduma min nuku axunmisdan. ²³⁻²⁴Israel minabu wakin min jatu katuni jabu jiwepakexankanikiki. Jiweabun, miadan, Jehováan, min jatun Dios ipakexanaai. Yudabu xukua betsa betsapa jiweabu keska Israel minabu jatu keska jiweama idiaxankanikiki. Diosuun, jau minabu ikubainxanunbun jatu tsumawanibu min jatu mebikinankidankin mina min jatu waniki. Ja dikabi min kushipawen dasibi jatu datekin jatun kena ewapa wakin jabuwen ‘¡Jabaa!’ imati wakin dasibi jiwebaunabu bebunxun Egipto nawabu anua jatu taxnimabidankin nawa xukua tibibun jatun yushibu jatu sa amakin min kushipa min jatu uinmakubidaniki.

²⁵Jaskawen taexun Jehová Diosuun, jaska ea inun enabu min jatu yubashina jatu jeneama, jaska min yuishina akin menekubainxanwen. ²⁶Min kena kushipa kenwankin xabakabi yui: ‘Jehová kushipajaida dasibi binua Israelin enabu mekenika Dioski’, ikin jau mikidi janchakin dayuikubainxanunbunwen, jeneamadan. Min jatu mekea David min tsumapan enabun mia ninkai jau pe jatu xanen ibuxunkubainxanunbunwen. ²⁷Enabu xanen ibu ikubainxanaibu miadan, Jehová kushipa dasibi binuatun min ea tapinmaiwen taexun en min tsuma bestibia dakeama en mia yukaii. ²⁸Jehováan, miadan, min mekenika Dios kayabiki. Min jancha chanima kayabidiki. Min tsuma min pepa betsa betsapa min ea yubaii. ²⁹Min tsuma min duawaxanai jakidi shinaindawe. Miki chiti ikaibu min jatu kexexun duawaya jau jiwepakexanunbunwen. Jehová Diosuun, min ma ea yubaxuki, min jatu pepa waya enabu xanen ibui jau benimai pepakubainxanunbunwen, jeneamadan”, anikiaki.

Mefi-bóset jawen ibu Jonatánwen taexun Davidin duawanikiaki, na janchadan

9 ¹Xaba betsatian Jonatánkidi shinanbaun Davidin jatu yukakin: “En jaibu Jonatán shinankin en duawakatsi ikaiwen taea ¿Saúlun enabu juni betsa texeni jiweyuamen?” jatu wa

²Saúl enabun dayadu juni betsa Sibá jiwea David yuiabu jau yuixuntanunbun jatu yunua ixuntanabu xanen ibujaida David anu Sibá jua yukakin:

—¿Jabia min miamen, Sibádan?— aka
kemakin:

—Xanen ibuun, min dayadudan, en jabiaki— aka
³xanen ibun ana yukakin:

—Saúl enabudan, ¿juni betsa texeima jiweyuamen? ean Diosun
kenawen taexun en medabewatidukidan— aka
Sibán kemakin:

—Jaa, Jonatánen juni bake bestichai jiweaki. Jakia jawen tae dabe
chakabuki— aka

⁴Davidin yukakin:

—¿Janimen?— aka

Sibán kemakin:

—Mae betsa Lodebar anu Amielin bake Maquirin jiwe anu
jiweaki— aka

⁵janua jau ixuntanunbun Davidin jatu yunua buxun David anu jawen
bakebidantiki nanexun iabidanaibun ⁶Jonatánen bake, Saúlun baba Mefi-
bóset David anu buteabu Davidki mesei ja bebun danti iki beti ikaya
benimakin Davidin yukakin:

—Jonatánen bake Mefi-bósetiin, ¿min miamen?— aka

—Jaa. Xanen ibuun, min ea kena en juxudan, min dayadudan, en
jabiaki— aka

⁷Davidin yuikin:

—Min epa Jonatán shinankubainkin pepawen en mia
duawakubainxanaiwen taea dateyamawe. Min juchi Saúlun mae tibi bai
pepa betsa betsapabu inun ji pepa xukuabu tibi inun jawen jiwe betsa
betsapa en mia ibu wamaxanaii, ibu wabianibun jau mia ana inanunbun
jatu mebinmakinan. Nenu Jerusalén anu jiwexun en tapu anuxun ebetan
min pikubainxanaii— aka

⁸jakia Mefi-bósetin kenwain ana beti ixun yuikin:

—Min en xanen ibujaidatuun, min tsumakididan, ¿jaskakin min ekidi
shinain? Eadan, en kaman mawa keska bestiki— aka

⁹jaska wabia Saúlun dayadu ja dukuntun dayaxunpauni Sibá jau junun
Davidin kena ana jua Davidin yuikin:

—Dasibi min tsuma Saúl inun jawenabus jayanibu jawen jamapaidan,
jawen baba Mefi-bóset en yunuxuki. ¹⁰Jaskawen taexun jawen bai tibi
min juni bakebu inun min dayadububetan dayaxunkubainxanwen.
Min tsuma xeni Saúlun enabun jau pi jiwekubainxanunbun miban
pawaibu tsekaxun janu aduti jiwe medan jatu mekexunkubainxanwen.
Jaskabiaken Saúlun baban ebetan pikubainxanikiki— akaya Sibá 15 juni
bakebu inun 20 dayaduyatun ¹¹kemakin xanen ibu yuikin:

—Dasibi min xanen ibujaidatun ea yunua en min dayaduwen taexun
en axunkubainxanaii— aka

januxun xanen ibujaidatun juni bake keska Mefi-bósetin Davidbetan pikubainikiaki, jawen tapu anuxunan. ¹²⁻¹³Ja dikabi Mefi-bósetin enabu inun jawen juni bakeishta jawen kena Micaías, Sibá inun jawen dayadubun jatu dayaxunkubainibukiaki, medabewakinan. Jamen Mefi-bóset Davidin duajaidawakubainxanaiwen taea Jerusalén anu jiwexun Davidbetan pikubainikiaki, jaska jawen tae dabe chakabu jawa xuxamadan.

**Juni betsa Urías jatu tenanmatan jawen ain Betsabé
janubi Davidin binikiaki, na janchadan**

11 ¹Xaba betsatian badi pakei ni jua tueaya jatun beya chibain xanen ibu detenamei bumisbutian Davidin jawen detenamenika xanen ibu Joab inun jawen detenamenika xanen ibu bexmasbu inun Israelin enabu detenamenikabu dasibi jatu yunua buxun Amón nawabun mai pakea anuxun jatu detekin maamatan jatun mae ewapa jawen kena Rabá jatu mebiainbu jakia David jatube kama Jerusalén anu niti ishian jiwea

²xaba betsatian juindukuin dakabai ma badi kai jikiaya David benikauni jawen jiwe sapa xeni manaundi anu nixun uinbaunkin ainbu jawenduajaida bachiuma nashiai ³bechitan: “¿Tsuamenkain? Uintankanwen”, iwanan, jatu yunua buxun yukatani bexun yuikin: “Eliamnén ainbu bake Betsabéki, Hitita nawa Uríasin ainan”, akabu ⁴jau ixuntanunbun jawen dayadubu Davidin jatu yunua yuitan ixuntanabu Davidin bichixun chutakin jawen juda idumawawen taea ainbu chuki nashitan janua jawen jiwe anu chintunkainima

⁵ana jimi ikama janu jimi imis binukainaya ma bake bima tuya unantan jau David banabimatanun jawen tsuma yunua kaxun: “Betsabé ma tuyakiaki”, iwanan, David yuia ⁶januxun ninkatan jawen detenamenika xanen ibu Joab anu jawen jancha bumakin Davidin yuikin: “Hitita nawa Urías jau juyunun ea anu nichinyuwe”, iwanan, jatu yunua, buxun jabias jancha Joab yuiabu David anu Joabin Urías yunua ⁷jukidan David bebun nitushiai Urías Davidin yukakin: “Joab inun nukun detenamenikabudan, ¿jaskada kaya detenameibu kaka bexun min ea yuiai?” aka Uríasin jaskaibu dasibi yuia ⁸ninkatan januxun bepadankin jau jawen ain anu katanun Davidin yuikin: “Min jiwe anu kaxun min tae chuki petan min ainbe juindukuin uxayutanwen”, aka Davidin jiwe jawendua anua Urías kankainaya Uríasin jiwe anu piti pepa inankuinkin xanen ibujaida Davidin jatu bumaxunbia ⁹jawen jiwe anu Urías kama Davidin jiwe jikiti xui dapi xanen ibujaida David mekemisbube Urías meshu medan uxashinaya ¹⁰jawen jiwe anu Urías kama uxashinai David yuiabu Urías jau junun Davidin kena Urías juai Davidin yukakin:

—Chaijaidakea min jua punu nukabia ¿jaskai min jiwe anu min kama ishiain?— aka

¹¹kemakin Uríasin yuikin:

—Ji punyan tinin wanxun xubu keska waxun Jehován jancha aduni bau tsaunmabu jabias keska anu Israelin enabu 10 xukuabu Jerusalén nortekidi jiweabu detenamenikabu inun Judán enabu detenamenikabudi pi uxakanikiki. En detenamenika xanen ibu Joab inun min xanen ibu bexmasbu jabias anudi kene anuma naxabakan uxadiakubainkanikiki. Detenameaibu keskai en jiwe anu jikixun pikin nuxukin en ain chutakin jaska dasibi betsa betsapa en atidumaki, bika tenebiakinan— aka

¹²jaskabiaya Davidin ana nichinkin:

—Jaskakenan, ikis ana bashikuyuwe, meshukidi min kaya en mia nichinxanaidan— aka

Davidin jaska wa jawen jiwe anu ana kama meshukidi jabanua katankatsi Jerusalén anu Urías bashikuken ¹³jabias xabatian jau jabetan piyunun itan Davidin pimakin Urías paenjaidawa janua meshu medan Urías Davidin jiwe anua kainkaina jawen jiwe anu ana kama jakia Davidin jiwe jikiti xui dapi xanen ibu mekemisbube Urías niti ika ana uxashinaya

¹⁴penama Davidin ninkatan detenamenika xanen ibu Joab jawen jancha kenexun Joab anu Urías inan buxun ¹⁵Joab inan bepenxun jaska Davidin keneshina june Joabin yuikin: “Jau jatube detenamenun Urías dukun jatu bebun nichinxanwen, detenamejaidai meseaibu anudan, jau ja dukun tsakakin tenanunbunan”, aka

¹⁶jaska kenexunshina uinkin ninkatan jau jatube detenametanus ixun jawen detenamenikabu yunukin Amon nawabun maewan Joabin jatu ana kexemabaunkin janu Amon nawa mentsisipajaidabu mapuabu bebun Joabin Urías yunukin nichian ¹⁷jatun maewan meekin Joabin detenamenikabu detenun ika jawaida kainbidan betsa betsapa jatu detekin Davidin detenamenika xanen ibu bexmasbube jatube detenamei mawabun chipu jatu benabaunkin ja mawabu anuadi Uríasdi tenanbainabu bechidiatan

¹⁸Amon nawabun maewan mebinun ika jatube detenamei jaskashinabu Joabin David anu jancha bumakatsi ikin ¹⁹jatun jancha bunika Joabin yunukin yuikin: “Jaskai nun jatube detenamekunkidanshina xanen ibujaida David min dasibi banabimakin keyua ²⁰xanen ibu sinatajaidakin, mia yukakin: ‘Ja maewan anuabu detenun ika ¿jaskai ja dapijaida bushianbumen? Maewan mishki kenebaunibu mamakixun mishki tunku putatidubu ¿jaskai nukunabun unanma ikasi jatu dapijaida bushianbumen? ²¹Mae Tebés anuxun mishki kenebaunibu mamakixun jawen deneti mishki ainbun jatu anu putakin Jerubaalin bake Abimélec tenainmabudan, ¿jabunan, shinanma ikanimenkain? ¿Jaskakin maewan

mishki kenebaunibu anu dapijaida bushianbumen?’ ikaya kemakin eska waxanwen: ‘Ja dikabi min xanen ibu bexmas Hitita nawa Urías jatube tenandiashinakiaki’, akin ea yuixuntanwen”, aka

²²jatun jancha bunika kai jikixun jaska Joabin dasibi yunushina xanen ibujaida David yuikin keyua jaska Joabin yuishina keskai David sinatajaidaya

²³januxun jancha bunikatun yuikin:

—Jemaintin xabakanxun nuku detenun ika Amon nawa detenamenikabun kainbidankin jabu dukuntun nuku binutan nuku detebaunabu chishtekidi jui mae jikiti xui anu nun jatube chintunkidanaya ²⁴januxun mishki kenebaunibu anuxun pia kuinwen nuku tsaka tsaka akaibun min xanen ibujaidatun detenamenika xanen ibu bexmas betsa betsapabu jatu maemakin tenankin januxun ja dikabi Hitita nawa Urías jatube tenandiashinabuki— aka

²⁵jaska wa ninkatan jatun jancha bunika Davidin kemakin yuikin:

—Eska Joab ana yuitanwen: “Ja mawashinabuwen jaskaida jatuwen dateyamawe, detenamedan, jabiaskakidan. Jakia ana kushipajaidakain ja maewan yamawakin man detekin keyutiduki”, akin jaska Joab yuikin min jatu shinan chankanwantiduki— aka

²⁶janua Betsabén ma jawen bene Urías mawashina ninkatan 7 día kaxakunkaini mainshinken ²⁷chipu Betsabé kaxa neseshinken jau itanunbun Davidin jatu yunua ixuntanabu jawen jiwe jawendua anu Davidin maewashinxun ainwanshina bebunkidi tuyaima juni bake kainbiaken jaska Davidin Urías ichakawaimawen taea Jehová jawen benimama inikiaki.

Natánen David chitekin ja anikiaki, na janchadan

12 ¹Diosun jawen jancha yuixunika Natán Davidbe jau janchatanun yunua ka jaki nukutan ja bebun nixun Natánen David yuikin:

—Eska xabakabi mia miyuinun ea ninkawe. Mae betsa anua juni dabe jiweabu betsa mabuwanyan betsa mitanuma mabu eskadabesya ²ja mabuwanyan chaxuwan inun ina awa midimajaida jayaken ³jakia ja juni mitanuma chaxuwan yuxan pishta besti peiwen bima jaya ibubis yumewakin jawen bakebubetan ewawakin jabias kenchaki piyai anua pimakin nuxuai anua amakin jawen xuchi anu datanxun uxankin yumewakubainkin ja junin jawen bake ainbu bechipaikin akawaya ⁴janua xaba betsatian juni betsa chai nimis bai tanabidani juni mabuwanyan jiwe anu uinun ika jikia, jakia ja juni jaki bayua jau bawaxununbun jawen inabu anua juni mabuwanyantun jawen ina mekatsi ikama jakia ja juni mitanuman chaxuwan pishta jamen bianxun jawen dayadubu bawamatan ja juni jua mabuyanwantun pimaimakiaki— aka

⁵Davidin ninkatan juni mabuwanyanki sinatajaidakin Natán yuikin:

—Diosun ninkaiwen taexun janchakin en mia yuiiai, ja junin ichakawakin chakabujaidawaimadan, jawen nuiama tenantiki. ⁶Jamen ja chaxuwan pishta pakakinan, jawen kadudan, dabe inun dabeki jau inanxanunwen, ja jawa ibubis jawen nuiiai uinmama ikimawen taexunan— ikaya

⁷Januxun Natánen yuikin:

—Ja junikidi en mia yuiaidan, jabia min miaki. Jaskawen taexun Israelin enabu mekenika Dios Jehován xabakabi mia yuikiki. Ninkawe: “Israelin enabu min xanen ibujaidakunkainxanun en mia katuniki. Bebunkidi Saúlun mia detekatsis ikaya jawen kushipa nemakin en mia mekekubainiki. ⁸Min jatu mekekubainxanun min xanen ibu Saúlun jiwe jawendua inun jawen ainbuaibu en mia yunuyamaki. Ja dikabi jawenabu anua Judán enabu tadi paxkanibu ja Israelin enabu paxkabiabainibun jabu anu en mia yunudianiki, ja dabe mekei min xanen ibu ikunkainxanunan. Jaska wakín en mia yununi eskadabes min shinanyan en ana mia ichapa inankeanaii. ⁹¿Jaskakin min en jancha ea ninka pewama ikimaxun en jaska bechipaii keska min akama danainmamen? Amón nawabu Hitita nawa Urías jatu tenanmanun, iwanan, jau Urías nichinxanun min Joab yunua Urías jatu tenanmaimaki, jatu jaska wamatan jawen ain mina wakín bikatsidan. ¹⁰Jaska wakín ea danankin shinanma Hitita nawa Uríasin ain biankin min ainwainmawen taexun ean minabu kupikin betsa betsapawen jatube en mia bika tenemakubainxanaii. ¹¹Eska Jehován mia yuikiki. Minabun jau mia chakabuwanunbun en jatu yunuxanaii. Min bedubi min ainbuaibu betsa mia mebintan mia dapi juni betsa jiwea en yunua xabakan badi chaxa anuxun min ain chutaxankanikiki. ¹²Jamen mia chutanameidan, june min ikimaki. Jakia ean jatu mia uinmakinan, Israelin enabu dasibibun uiainbun en jatu xabakanxun chutanamemai uinxankanikiki” — akin Natánen Jehová jancha yuixuna

¹³e itan jaskaima Natán bebuxun Davidin yuikin:

—Jhová danankin chakabu betsa betsapa en akimaki— ikaya kemakin Natánen yuikin:

—Min chakabuwanmawen taexun Jehován mia kupia min mia mawama ixanaii. ¹⁴Jakia Jehová jabi min dakejaidawaimawen taea min juni bake Betsabé dama kainshina samama ja mia mawaxunxanikiki— atan

¹⁵Januxun ana jancha wama Natán jawen jiwe anu chintunkainken janua Uríasin ainki Davidin bake waima ma kainshina Jehován isin tenema chakayamaya ¹⁶jawen bakewen nuijaidai jawa piamajaida samakei meshu chaitanai jinamas main tin ika dakaxun jau jawen bake xuxanun Davidin Jehová yukaxunkubainaya ¹⁷janua anibu unanepabun David medabewamisbu buxun main daka benitan pimanun, iwanan,

unanxubida yui pewabiabu jakia jatu ninkabiatan jatubetan piama ikunkainaya

¹⁸Janua 7 día binutan jawen juni bake mawaya anibu unanepabun jawen datei yuiti tenekin shinain: “Jawen bake jiweyuken nun daewakin jancha wabia nuku jawa ninkamajaida ishianki. ¿Ma bakeishta mawaken jadakidi nun yuitidumen? Ninkatan itimaskakauani ibubis ichakanikatiduki, jawen nui isin teneidan”, ika shinain dateaibun

¹⁹Janua june anibu unanepabu yuinameaibu uinxun jawen bake ma mawa shinankin jatu yukakin:

—¿Bakeishtadan, ma mawaxumen?— jatu wa jabun kemakin yuikin:

—Jaa, ma mawaxuki— akabu

²⁰Jaska wabu ninkatan main daka benikaini ka jawen tadi detsis pekatan nashi petan tadi bena sawetan xeni inintiwen cha ikeaketan Dioski nukuti tadi jiwe puntea anu kaxun tadi jiwe bebun jemaintin danti iki beti ixun Jehová kenwanbai chipu benikaini jawen jiwe anu kaxun jatu piti yuka bexuanbu pikin nuxukin yaniwaya

²¹Jatun beya chibanmawen taexun anibu unanepabun yukakin:

—Xanen ibuun, tsua jaskatimabiaken nukun beya chibanma ¿min jawai jaskai? Min bake isin tenei jiweyuken samakei min bakewen taea min kaxakunkainshinaki. Jakia ma mawaken bis bis iki kaxama benikidan min ma piaii. Nuku tapinmawe, jaskada shinain min ikimenkainan— akabu,

²²kemakin Davidin jatu yuikin:

—En bake isin tenei jiweyuken jau mawayamanun ewen Jehová nuitiduki, ixun shinain samakei en kaxakunkainshinaki. ²³Ikis ma mawaken jaska waxun en ana jiwematidumawen taea jamen en samaketidumaki. Jaska watan ana chintunwankin en jiwematidumaki. Chipu eadi mawatan en jaki nukui ka jadi eki nukuxanikiki— jatu wanikiaki.

Salomón kainikiaki, na janchadan

²⁴Janua jawen bake debuimaken jawen ain Betsabé Davidin atimas daewaxun ana chutakubaina ana bake bima juni bake kaian Davidin kenakin: “Salomónki”, anikiaki. ²⁵Ja juni bake bechipaikin Diosun jancha yuixunika Natán yuimakin Jehová David unanmawen taexun jawen kena betsa wakin Davidin kenakin: “Jedidíaski”, adianikiaki, nukun janchawen: “Ja Jehová bechipaikiki”, akinan.

David xanen ibu jawen bake Absalónen mebinun ika inikiaki, na janchadan

15 ¹Jerusalén anu Davidin juni bake betsa Absalón jiwekunkaini ibubis shinan chakai kein xanen ibuxanun, iwanan, jawen

caballo tadanti pepa inun caballo kushipabu bitan 50 detenamenikabu katukin jatu tsumawatan ma jatu yunukubainmis ²penama tibi Absalón bututan jawen epa Davidin jiwe anu jawen mae kenebaunibu janu jikiti xui anu xaba tibi kexea Absalón nixun xanen ibujaida jawadakidi ichakanikatima Davidin jau jatu pewaxunun yukakatsi janu beaibu, bestibu jatu kenaxun Absalónen jatu yukapakekin: “¿Jadatu mae anua min juai?” jatu apakeaya jatun mae inun jadatuda Israelin enabu xukua anua inun jaska shinanbidankin xanen ibujaida David jadi yukai beaibu bebunkidi yuiabu ³Absalónen ninkatan jatu yuikin: “Chanima jawada min yukakatsi ikai peki, ichakanikatimadan. Jakia xanen ibujaida min yukai tsuan mia yuixuntidu jayamaki”, ⁴iwanan, jatu yuikubainmis: “Ean matu medabewakin en matu duawaya jawada yuka iki jau man eanu bexanunbun nukunabu dasibi xanen ibuxuni en matun unantinankatsis ikai man ea katutidumenkaintsa”, ikin jatu yuikubainaya ⁵tsuanda yukatanun ika chaima juai jatun beya chibankin metaka atan jaibuwakin ikuxun jatu tantsu akubainmis ⁶xanen ibujaida Davidin jau bika teneaibu jatu xabakabi pewaxunxanun Israelin enabu dasibi beaibu Absalónen jatu nemakin jaibuwakin jatu shinan betsamakin David jau ana shinanyamaxanunbun ibubis jakidi besti jatu shinanmakubainaya

⁷jatu jaska wakubaini 4 año nichintan jawen epa David anu kaxun Absalónen yuikin:

—En xanen ibuun, jaska en Jehová yubaima Hebrón anu kaxun ea atanun ixun en mia yukaii. ¿Katanpa? ⁸Min dayadu eadan, Siria anu mae betsa Guesur anu jiwexun yuikin: “Jerusalén anu en ana jiwexanun Jehován ea yunua Hebrón anuxun chaxuwan bake tesenxun chiwen menukin keyukin en mia kenwain juxanaii”, akin Jehová en yubaimaki— aka

⁹xanen ibujaida Davidin kemakin yuikin:

—Unanuma katanwen— aka

jakia Hebrón anu Absalón kadiama ma jatu pewamis jadi kakin ¹⁰Israelin enabu xukuabu tibi anu jawen jancha bunikabu yunukatsi jatu yuikin:

—Trompeta chan chan akubainaibu ninkatan: “Hebrón anu ma xanen ibu bena dasibibun Absalón ma katuabuki”, akin jatu yuiakeakebantankanwen— jatu wa buabun ¹¹ja dikabi 200 junibu Jerusalén anu jiweabu jawen jancha ikunwain jawen chakabu unandiana Hebrón anu jabe budiabun ¹²chaxuwan bake ichapa tesenxun chiwen menuxunkin jabetan Jehová kenwantanun, iwanan, Davidin medabewanika betsa jawen kena Ahitófel jawen mae Guiló anuadan, Absalónen ja iyukatsi kena kaxun Absalónen jatu yunua jaskakubainaibun David xanen ibu mebinkatsis ikin Absalón kushipakin jabun chibanmis xaba tibi jatu ichawakubainaya

Jerusalén anua David jawaida paxanikiaki, na janchadan

¹³jaska Absalónen akai unantan jancha bunika David anu kaxun yuikin:

—Israelin enabu ichapajaidatun Absalón chibanun ixun shinankanikiki, xanen ibu wakatsi ikinan— aka ¹⁴jaska wa ninkatan jawen xanen ibu bexmasbu dasibi Jerusalén anu jabe jiwexun mekeabu Davidin jatu yunukin:

—Dasibi menan jawaida taxnidibainankanwen. Nun yane kamaken Absalón juken nun jaskatan paxatidubumaki. Jawenabu bexun nuku chakabujaida wakin nenu Jerusalén anu nukube jiweabu nupe kenu chaipawen nuku dete keyui betidubuki. Menan budinankanwen— jatu wa

¹⁵jatun xanen ibu kemakin yuikin:

—Min nukun xanen ibujaidatun jaska min nuku shinaxuna nun mibe kiai— akabu

¹⁶janua David taxnikainkin jawen ain betsa betsapabu inun, jawen bakebu junibu inun ainbuaibu inun, jawen xanen ibu bexmasbu inun, jawen tsumabun dayadubu jatu iyukin jawen jiwe jawendua jau jabun besti mekexunkubainunbun ja 10 jawen ain nantakea jabu dayaxunmisbu jabu besti bashibaini Jerusalén anua xanen ibujaida David paxai kainkaini ¹⁷jabun chibainbu dasibibube David kai maewan kesukauana jawen jenea jiwe anu David jatube niti itan ¹⁸januxun jawen xanen ibu bexmasbun David jau kexebainunbun ja dapi jatu nichintan januxun jawen yuda jabun mekemis Querete nawabu inun Pelete nawabu bebuaiibun ja kachu 600 detenamenikabu Geteo nawabu David dapi mapuabu Gat anua David dayaxunun ika jabe benibu jabe mapumisbu ja kachu jatu bebun mapudiabun ¹⁹jatu jaska waitian juni betsa Filisteo Gat anua jawen kena Itai jushian bechitan xanen ibujaida Davidin yuikin:

—¿Jaskai mia dikabi min nukube juai, paxaidan? Nawa betsa min dama jushian min nukunabumaki. Jaskamaki. Min chintunkaintiduki, xanen ibu benabe unanuma jiweidan. ²⁰Dama Jerusalén anu jiwetanun ika min jikishinaki. Jaskawen taea: “Ebe kawé”, en mia watidumaki. Janida emebi en kai en unanmawen taexun min nukube kanun, iwanan, en mia yuitidumaki. Minabu iyui min jiwe anu chintundikaintanwen. Min jaskakainaidan, peki. Min ewen nuiaya jau Jehová mia duawakin medabewakubainxanunwen— aka

²¹kemakin Itain xanen ibujaida David yuikin:

—Min mekenika Dios Jehová inun min en xanen ibu matu dabe ikunwankin en matu chibainwen taexun en mia yubaii. Janida min kaya min dayadui en mibe kiai. Min jiweken en mibe jiwexanaii. Min mawaya en mibe mawadiaxanaii— aka

²² jawen jancha ninkajaidatan kemakin Davidin yuikin:

—Jaskakenan, nukube kakunkainwen— aka

jabiatiandi Itai inun jabe beshianbu Davidbe bui ²³ Jerusalén anua kainbainaibun jatu dapi jiwebaunabun buaibu jatu uin jatuwen nui kaxa chakayamaibun Paxku Cedrón pukebainaibun jatu chibain xanen ibujaida David paxku pukediabaini jadi tsua jiweabuma anu David bebuxuni bai tanabainaibun ²⁴ Paxku Cedrón pukediabuma Dios jatube yubakani jancha aduni bau Levín enabun iabainaibube Diosbe jatunabu janchaxunika dabe Sadoc inun Abiatar paxku kexa anu jatu bebun buaibun Abiatar dapi Diosun jancha aduni bau tsuanbu Davidbe bukin dainbainbainaibun ²⁵ xanen ibujaida David kaxun Diosbe jatunabu janchaxunika Sadoc yuikin:

—Maewan Jerusalén anu Dios jatube yubakani jancha aduni bau bui chintunkainwen, Jehová ewen nuikin ea medabewa ana chintunkidan jawen jancha aduni bau inun jawen tadi jiwe jania en ana jaki nukutidumenkainan. ²⁶ Jakia ea jawa bechipaiama jaska shinain keska jau ea amaxanunwen— iwanan, ²⁷—Uian. Mia inun Abiatar Jerusalén anu matun juni bake dabebe unanuma chintunbainditankanwen, mia min juni bake Ahimaasbe inun Abiatar jawen juni bake Jonatánbedan. ²⁸ Jerusalén anuxun man Absalón manaya enabube en kainkidanshinaki. Janu tsua jiweabumanu Jene Jordán napanpa puketi pe anuxun en manayuaii, Absalónkidi jaskadada jawen kaka man ea yunuai manaidan— jatu wa

²⁹ Levín enabu Diosun jancha aduni bau jatu iamabaini Sadoc inun Abiatar Jerusalén anu chintunbainshinxun jadixun manaibun ³⁰ Olivos Mati anu jawenabube kai Davidin jawen bichi tae pekatan mapekei juinti nishma kaxai tadiwen mayabukua kaya janua jabe buaibudi mapekediai tadiwen mayabukudia juinti nishmadi kaxadiakubainaibun ³¹ Ahitófel unanepatun David medabewakubainima ana medabewama jakia natian Absalón medabewaya David yuiabu jau Ahitófelin jaska shinain Absalón amakatsi medabewakubainai jau jaska amakatsi ikai Jehován kanemaxanun Davidin Jehová dayuikin ea akaya

³² mati mamaki anu januxun Dios kenwanmisbu anu David ma mapeketanaya unudia jaki nukutanun ika jawen jaibu Arquita nawa betsa Husai jawen tadi ushnikia mai mishpuwen mapu tukua Davidki nukua ³³ Davidin yuikin:

—Ebe kakin ea jawa medabewamabia min ana ea bika tenematiduki.

³⁴ Jakia Jerusalén anu chintunkaini kaxun nashi petan tadi bena sawetan Absalón juai yuikin:

“Xanen ibuun, en min dayaduki. Jabias min epa en medabewakubainima keska wadiakin unanepa janchawen en mia medabewakubainxanii”, akin jaska Ahitófelin shinanxunkin

medabewabiamisken mian jawen shinan betsa wamakin Ahitófel ea nemaxunkin min ea medabewatiduki. ³⁵Diosbe nukunabu janchaxunika dabe Sadoc inun Abiatarin ea medabewadiakubainkanikiki. Xanen ibujaidatun jiwe jawendua anuxun jawada dasibi ninka keyukin matun ea yuixunkubainxankanwen. ³⁶Jawada Sadoc inun Abiatarin mia anua ninkatan jatun juni bake Ahimaas inun Jonatán yunuabu eanu bexun jabias jancha ea yuitidubuki— aka

³⁷Davidin jaibu Husain ninkatan kai Jerusalén anu jikiaya jabiatandi Absalón xanen ibui jaki chiti ikabube jikidiaya

Sibán David jaibuwai jabe janchanikiaki, na janchadan

16 ¹mati mananan atimas binubaini David ana kai, Davidin jaibu Jonatánen bake Mefi-bósetin dayadu jawen kena Sibá jawen jiwe anua kainkidani uintanun ika Davidki nukui kakin asno pepa dabe ja kabekantiyaki 200 misi ewapabu saku tibiki nanekin inun, 100 uva bimi tsusin tsanpawakin kextu shadabu watan sakuki matawatan inun, 100 bimi piti jushian saku tibidi matawatan bichi bixtu uva vinodi jaki nanetan duntanbaunkin bexe pewatan bui Davidki nukua ²dasibi uinkin xanen ibujaida Davidin Sibá yukakin:

—¿Jaskakin na jaska tibi min beai?— aka
daewakin Sibán kemakin yuikin:

—Na asno dabedan, xanenibun enabus katsaumbaintidubuki. Misi inun bimidan, bedunanbu min detenamenikabun pitidubuki. Janu tsua jiweabumanu bui jin ikin vino atidubuki— aka

³Davidin ana yukakin:

—¿Jania, min xanen ibu Saúl ipaunitun baba Mefi-bósetdan?— aka
Sibán kemakin yuikin:

—Jaska jawen juchi Saúl xanen ibukunkaini keska Israelin enabu dasibibun xanen ibu wakin ana katutidubuwen taea shinain en tsuma Mefi-bóset Jerusalén anu bashikuyuxuki— aka

⁴jawen jancha ninkatan:

—Mefi-bóset en pepawabiani ana jakidi shinanma jawen jamapai tibi Mefi-bóset jayani mebintan ikis dasibi en mia yunuai minaki— aka
David bebun danti iki beti ixun Sibán kemakin yuikin:

—Peki. Min en xanen ibu kayabiwen taexun min ea medabewaya en mia shinankubainxanaii— aka

⁵janua David ana kai mae betsa jawen kena Bahurim dainbainaya juni betsa Saúlun enabu Guerán bake jawen kena Simí ja bebun taxnikidan jawenabu inun jawen tsumabu detenamenikabun David mekebiabun jancha chakabuwakin ichakin ⁶David inun jawen xanen ibu bexmasbukidi mishki tunku puta puta akubainkin ⁷jaki sinatajaidakin yupukin Simín David yuikin:

—Miadan, min juni puben chakabuki. Nenu juama kawé, kawé— akin
 8—Saúl xanen ibuai mebinkin min jawenabu chakabuwakubainiwen
 taexun Jehován mia ma kupiaki. Min xanen ibuai mebintan min bake
 Absalón Jehován xanen ibu waikiki. Iubis min chakabun mia ma achia
 miadan, min juni betsan jimi akubainmiski, jawa pepa wamadan— akaya
 9Seruíán juni bake Abisain David yuikin:

—¿Jaskakin ja juni kaman mawa pisi mayai keskakin min en xanen ibu
 mia yupukin yuainmenkain? ¿Kaxun jawen buxka textetanpa?— aka
 10jafia xanen ibujaida Davidin kemakin yuikin:

—Seruíán bakebuun, matu akamaki. Ea besti yupukin yuinun ja juni
 Jehován ma yunuamenkain. Jehován ma yunuadan: “¿Jaskakin min
 xanen ibu yupukin yuain?” akin, tsuan ja juni bextetidumaki— atan,
 11Abisai inun jawen xanen ibu bexmasbu Davidin ana jatu yuikin:

—En bake kayabitun besti ea tenanpanan ja juni Benjamínen
 enabu dikabitun ea yupuikiki. Nemayamakanwen, jabiaska Jehován
 yunuakidan. 12Jaska ikis ea bika tenemaibun Jehován uinkin ekidi pe
 shinankin ea ana duawakubainxanimenkain, na yuputi jancha chakabu
 en ninkai keskamadan— jatu wabaini

13David jawenabube bai tanabainaibun manan machi tantanbaini
 kakín David yuankin yupukubainkin mishki tunku inun mai mishpu
 Davidkidi Simín puta puta akubainaya 14Simí ana shinanma David inun
 jawenabu bui Jene Jordán kexa anu nidi itan punu nukabaina juindukuin
 maniabun

Jerusalén anu Absalón jikinikiaki, na janchadan

15Jerusalén anu Absalón jikinun ika kaya Israelin enabu ichapabu inun
 Ahitófel chibain buaibun 16janua unudiadi Davidin jaibujaida Arquita
 nawa Husai Absalónki nukui jui kushipawen yui sai ikunkidani:

—¡Nukun xanen ibui jiwekunkainxanwen!
 ¡Jiwekunkainxanwen!— ikaya

17metukin Absalón shinan chankanma Husai yukakin:

—Ea kenwankin en epa min jaibuwanidan, ¿ana shinanma min ma
 putamen? ¿Jaskai min jabe kama ishianmen?— aka

18bepadankin Husain kemakin yuikin:

—En katidumaki. Jau xanen ibukunkainxanun tsuada Jehová inun
 Israelin enabu dasibibun ma katushinabe en bashikuyuai. 19¿Ja dikabi
 tsua en medabewatidumen? Min en jaibun bakeki. Jaska min epa en
 medabewakubainima keska wadiakin unanepa janchawen en mia
 medabewakubainxanai— aka jawen jancha Absalónen ninkatan

20januxun chipu Absalónen Ahitófel yukakin:

—¿En epakidi nun jaskaxanai? ¿Jawa man ea shinanmakin
 yusintidumen?— aka

²¹ Ahitófelin kemakin Absalón yuikin:

—Jawen jiwe jawendua jau mekexununbun jawen 10 nantakea ain jawen dayadubu min epan jatu bashibainshina jabu tibi chutan keyuwe. Min jaska waya Israelin enabu dasibibun ninkakin min epa danankin min sinatamai unanxankanikiki. Ja dikabi jabun mia chibainbu dasibibu ana benimaxankanikiki— aka

²² jawen yusian chibankin Davidin jiwe jawendua mamaki tadi jiwe wakín puntexunabu Israelin enabu Jerusalén anu jiwexun uianbun jawen epan 10 nantakea ain jawen dayadubu tibi Absalónen jatu chutankubainikiaki. ²³ Jaskakunkainaitian jawada akatsi yukakubainabu Ahitófelin jatu shinanxunkin kemaya ja dukun Davidin ikunwanpauni keska wakín jawen bake Absalónen ikunjaidawadiakubainikiaki, Dios yukai keska wakubainkinan.

Ahitófelin yuba jancha Husain itimaskawanikiaki, na janchadan

17 ¹ Januxun jawaida medabewakatsi ikin Ahitófelin ana Absalón yuikin:

—12,000 detenamenika pepabu jatu katunún ixun en shinaiin. Na jabias meshu medan David detetanun ika jatubetan en chibankatsi ikaii. ² Ikis David inun jawenabu babua punu nuka maniabu jatu datetushikin jawaida nun jatu tenantiduki. Datei jawenabu dasibibun jenebaini paxaibun jatun xanen ibujaida David besti nun tenantiduki. ³ Juni bestichai min tenankatsis ikaii. Nun mia jaska waxunaya min epa ana jayamaken Israelin enabu en mia daewaxunxanii, jau mia ana dananyamanunbunan. Jaskawen taea dasibibu unanuma jiwekubainxankanikiki— aka

⁴ Absalón inun anibu unanepa medabewanikabun ninkatan jawen yubati jancha pe bechipaiaibun ⁵ jakia jawen shinandi jau jatu yuiyunun Arquita nawa Husai jau kenatanunbun Absalónen jatu yunua yuitanabu ⁶ Absalón anu Husai jua Ahitófelin jaska jancha yubakin yuixunxu Absalónen Husai yukakin:

—Jaska Ahitófelin ma nuku yubaxudan, ¿jawen jancha chibankin nun atidumen? Nun atidumadaka. Jaskada mian min shinainmenkain, nuku yuiwe— aka

⁷ kemakin Husain yuikin:

—Jaska shinain pe yuibiamis ikis jaska yubakaxudan, pemaki. Entsedí mia yuinun ninkawe. ⁸ Min epa inun jawen detenamenikabu mentsisipa pubenjaidabuki. Yuinaka oso yuxan puben jawen bakebu bianbainabu pubenjaidakin benai keskai sinatai min epa mesejada dakaki. Min unaiin. Ja dikabi min epa ma detenamei beyawen taea jawenabube uxama jakia tadi benanta junea uxakunkainikiki. ⁹ Na jabia ikis mishki tanpe medan kasmai, benanta tadi june anu ikaki. Jamen betsadan,

detenamenikabu ichapama duakabi min jatu yunua min epan enabube detenamei mina jatidi mawakubainaibun jakidi banabitan: “Davidin enabun ma minabu jatu maemakin keyuabuki”, iwanan, yuikubainaibu dasibibun jabiaskas shinantidubuki. ¹⁰Minabu puben sinatabu inu betsa león keskabia jaska ninkatan punu nukai babujaidaxankanikiki. Min epa inun jawenabu jabun chibanmisbu pubenjaidabudan, Israelin enabu dasibibun unanjaidakanikiki. ¹¹Ean en mia yusiainan, eska shinankin en mia yuiai ninkawe. Israelin enabu juni dasibibu norte Dan anua inun Sur Beerseba anua namakis jiweabu ianenwan kexa mashiti keska mia anu jau ichai keyuxanunbunwen. Ma min janu jatu ichawa min epan enabube detenamenun ika mian ibubis jatu yunui jatube kaxanwen. ¹²Janida kawanai jaki nukutan nun detexanaii. Basnunwen basi mecha wamis keska wakin nun jatu achixanaii. Min epa inun jawenabu junibu tenan keyukin nun betsa jeneama ixanaii. ¹³Jakia mae betsa mishkiwen kenebaunibu anu paxai jikiaibun Israelin enabu juni dasibibun dispi buxun jawen mishki kene tseka tseka akin keyutan dispiwen neatan xadabainbainkin paxku anu puta keyukin mishki bestichai nun jenetidumaki, jaska watan jatu dasibi tenankin keyukinan— aka

¹⁴jaska wa ninkatan Absalón inun Israelin enabu anibu unanepabu yuinamei: “Ahitófelin nuku yusiain jancha pebia Arquita nawa Husain nuku yusiain janchawen Ahitófel binumakin pewaikiki”, inibukiaki. Absalón chakabuwamakatsi ikama Ahitófelin yusian jancha pepa Jehová jatu chibanmakin amama inikiaki.

¹⁵Jatu jancha wabaini kaxun jawen yusian jancha Ahitófelin Absalón inun Israelin enabu anibu unanepabu jatu yuixu inun jawen yusian jancha jatu yuidiaxu Diosbe jawenabu janchaxunika Sadoc inun Abiatar Husain jatu banabimatan ¹⁶ana jatu yuikin:

—David inun jawenabu jadi tsua jiweabuma anu bushianbu jau jatu tenanyamanunbun janua jene puketi pe anu ana uxama Jene Jordán kexa betsauidi jau jawaida pukebaintanunbun jawaidakain David jau yuitanunbun matun juni bakebu yunukanwen— jatu wa

¹⁷Jerusalén anuxun jau jatu uinyamanunbun Diosbe jawenabu janchaxunikabun juni bake dabe Jonatán inun Ahimaas jatu yunukin nichian mae betsa Jerusalén binubaun jawen kena En-roguel anuxun manai maniabun jawen dayadu ainbu yuia ja ainbu jawaida kaxun jatu yuia David yuinun ika jawaida ja dabe kainbainaibun ¹⁸jakia jaskabainaibun bedunan betsan jatu uintan ja dabetun David banabimanun ika buaibun jawaida kain Absalón banabima jatu yunua chibainbun janua jabu bui mae betsa Bahurim anu jatun jaibun jiwe jemaintin anu jikitan, jabianudi unpax bimisbu kini mishki kenebaunibu anu junei jikiaibun ¹⁹januxun jawen ainen beputi ewapawen jatu bepuxun ja mamaki xekiwan trigo xemeshina jexe badin wankin bexna tsuan jawa unanmaken ²⁰ja kachu jatu ichun jatu benai Absalónen dayadubu buxun ainbu yukakin:

—¿Ahimaas inun Jonatánan, jani bukanxumen?— akabu ainbun jatu bepadankin yuikin:

—Nenu nuku dainbainkanxuki, jenekidi bukinan— jatu wa, jenekidi buxun benakubauntani jatu bechiamo Jerusalén anu chintunbainaibun ²¹ma buabu uintan jatu bepeanbu unpax biti kini anua Ahimaas inun Jonatán kainbaini kushibain xanen ibujaida David anu buxun yuikin:

—Ahitófelin jau matu tenain benunbun jatu yunuxukiaki. Jawaida benitan jene pukedibaintankanwen— jatu wabu ²²jatun jancha ninkatan David inun jawenabu beni keyutan jawaidabaini Jene Jordán ma puke keyubainabun ma penaken jene kexa tsua ana janu jayabumaken

²³jawen yusian jancha ninkatan axuanbumawen taea Ahitófelin unantan punu nukai juinti nishmatan jawen asnoki katsaumekaini kainkaini janua kaini anu kaxun januxun jawen jiwe inun jawen mabu inun jawen yunu bai betsa betsapa jawenabus jatu yunu keyutan jabiatandi dispi bua jiki nexatan ibubis tenexeketan mawa jawen epa maiwanibu dapi maiwadianibukiaki.

Mae betsa jawen kena Mahanaim anu David jikinikiaki, na janchadan

²⁴Jene Jordán pukebainshina nortekidi bui maewan betsa jawen kena Mahanaim anu David jawenabube jikiaya, jawen bake Absalónen Israelin enabubetan David chibain Jene Jordán pukediabainaibun

²⁵Joab Davidbe kashianwen taexun jawen detenamenikabu xanen ibu bena katukatsi ikin jau jatu bebuxunun Absalónen Amasá katunikiaki. Amasán epadan, Ismaelin enabu betsa jawen kena Itrá inikiaki. Itrá Abigailbe chutanamemisdan, Abigail inun jawen betsa Seruíá Nahasun bakebu inikiaki. Seruíá Joabin ewa inikiaki.

²⁶Galaad mai pakea anuxun Absalón inun Israelin enabu jabe buxun jatun tadi jiwe puntebaunabun ²⁷⁻²⁹Mahanaim anu David kai jikitushiaibun jatu bechibidankin shinankin: “Jadi tsua jiweabumanua punu nuka, bunibidani unpax manubidankanikiki”, iwanan, jatu i pewakin jatu duawakin jaki dakati inun, mai kencha inun, mai kenti inun, jatun piti xekiwan dabe trigo inun, cebada dudu inun, tsui inun, yusu ewapa inun, yusu pexemishtin lentejas inun, buna bata inun, awa chuchu katsai buspuai inun, ina awa inun chaxuwan chuchu tanki Davidbe beabun jau pinunbun jawen dayadubu jatu bumaxuni Amón nawabun mae jatun kena Rabá anua Nahasun juni bake Sobí inun, mae betsa Lodebar anua Amielin juni bake Maquir inun, Galaad mai pakea mae betsa Roguelim anua Barzilai xanenibun ja dabe inun bestitun Mahanaim anu David jikia bechibidan duawanibukiaki.

Detenamekin Joabin Absalón tenanikiaki, na janchadan

18 ¹Jawen detenamenikabu jatu unanti wakin dasibibu Davidin jatu tana keyukin ja dukun 1,000 juni xukuabu tibi paxka keyutan xukuabu tibi anua juni bestichai xanen ibu wakin keyudiatan januxun

ana jatu paxka betsa wakín 100 junibu tibi xanen ibu bexmas jatu katumadiatan ² dasibibun detenamenikabu xanen ibujaida dabe inun besti katukin Seruíán bake Joab inun, Joabin betsa Abisai inun, Gat anua Filisteo nawa Itai katuxun jau jatu yunukubainunbun jati xukua detenamenika Joab anu yunukin jati xukua betsa jabiatidi detenamenika Abisai anu yunukin jati texekanxu jabiatidi detenamenika Itai anu yunukin keyutan jawen detenamenikabu dasibi Davidin jatu yuikin:

—Man detenamei kayadan, en matube kaii— jatu wa

³ jakia jabun kemakin:

—Jaskamaki. Xanen ibuun, nukube kayamawe. Nuku deteaibun nun paxaimenkain. Nuku namakis tenankanimenkain. Absalón inun jawenabun nuku detenun ika juama jakia mia besti tenankin yamawakatsis ikanikiki. Jaskaken mia min nukun xanen ibu nun mia mekei yaushijaidaii, nuku 10,000 keskadan. Jaskawen taea min nukun xanen ibudan, na jabia mae mishki kenebaunibu anu min niti ika pejaidaki. Na jabanuxun betsabu min jatu yunutiduki, jau nuku medabewai bununbunan— akabu

⁴ jatun jancha pe ninkatan xanen ibujaida Davidin jatu kemakin:

—Jawada pe man shinankin man ea yunubaina en matu axuntiduki— jatu watan jawaida jikiti xui anua kaintan David xabakan nixun jatu uianyan detenamenikabu xukua tibi 1,000 paxxaxu 100 tibi jatun xanen ibuya maewan Mahanaim anua kainbainbainaibun

⁵ Joab inun Abisai inun Itai jabu tibi kaindiabainaibu Davidin jatu yuikin:

—Man ewen nuaiwen taexun en bake Absalón achitan ea pe mekexuntankanwen— jatu wapakeaya jaska Absalónkidi Davidin jatu yunuai dasibibun ninkabainbainaibun ⁶ Absalón Israelin enabu xanen ibuxunaya jawen detenamenikabube detenamenun ika main bui

Efraín paxku napanpa anu ni xukua tsukus anu Davidin enabu inun Absalónen enabu nukukunantan detenamei taei ⁷⁻⁸ Davidin enabun jatu maemakin detekin midima tenankubaini mai pakea jidabi anua jatu detekubainkin machatu chaipawen mawaida xabakanxun jatu tenantidubumabia paxai bui ni xukua tsukus anu jiki idui yumainbu midimajaida jatu tenanbu jabias xabaki 20,000 junibu mawanibukiaki.

⁹ Detenameibu napuman Absalón mulo katsaumea kainkainaya achitanun ika Davidin enabu jachun kushibainkin chibanbainabu muloki katsaua Absalón paxai kushikaini ji ewapa punyan tinian tebebakainkin Absalónen bu chaipa ji punyan tuaxki ustankin yabukin mestenwan dunuken mulo besti ja mais kushikainaya ¹⁰ Joabin detenamenika betsan Absalón dunua uinbaini kaxun Joab yuikin:

—Absalón ji punyanki jawen buwen yabukutan dunua jukin en uinbidanaii— aka

¹¹kemakin Joabin jawaida yuikin:

—¿Uinbiakin jawakin jабianua tenankin min main pakeama ixumen? Min jaska wabidanaya benimakin 10 plata pei jexe ewapa inun chinexeketi bena jawendua en mia inankeanaii— aka

¹²jakia ja junin Joab kemakin yuikin:

—1,000 plata pei jexe min ea inanbia nukun xanen ibun bake en jawa jaki sinatakin ichakawantidumaki. Jawen bake Absalón mekenun ixun nukun xanen ibujaida Davidin mia inun Abisai inun Itai matu yunuai dasibitun nun ninkabidanaki. ¹³Jaska min ea yunuai keska en abidaxudan, en jamen akeanxuki. Jakia dasibi yuka imiswen taexun nukun xanen ibu nun padantidumaki. Tapintan jawen bake en tenananken jau ea kupinun jatu yunuaya mian min ea jawa nemaxuntidumaki— aka

¹⁴Joabin kemakin yuikin:

—Jatixuinda jamen en mibe janchatidumaki— abain Absalón dunua anu kaxun jashi dabe inun besti buxun jawen juinti anu ja dabe inun bestiwen chachi chachi aka mawai xankan ikaya ¹⁵janua 10 junibu jabun Joab medabewaibu kainbidan Absalón kexebaunxun namekin chachi chachi akabu mawaya ¹⁶jatun mimawati trompeta jau chan chan anunbun Joabin jatu yunua chan chan akaibu ninkatan Absalónen Israelin enabu detenamenikabu chibankin jatu detekubainaibu jenetan Joabin jatu ma kenawen taea Joab anu chintunbidanaibu ¹⁷Absalónen yuda butexun bukin ni tsukus anu kini ewapa anu jawen yuda putatan, mishki tunku shadabu bitan bitankin jawen yuda achimakin jaki maspu wakin keyatapawabu jatun xanen ibu Absalón ma mawa unantan Israelin enabun jabun chibankubainshinabu datei jatun jiwe tibi anu junei paxai buake buakenibukiaki.

¹⁸Absalón mawadiama jiweyuxun jatu yunukin:

—En juni bake jayama iki kaimenkain. Jaki en kena en netain mishki keyatapa ea waxunkanwen— jatu wa mishki keyatapa nichinxunkin ja napanpa jawen kena Xanen Ibujaidatun Napanpa anu nichinxunabu janu jawen kena shinanpaketi jaki jawen kena netanikiaki. Natian ja mishki shinanmati keyatapa uinkin kenakin: “Absalón Shinanmatiki”, ikubainmisbuki.

¹⁹Absalón ma mawaken Diosbe nukunabu janchaxunika Sadoc juni bake Ahimaasin Joab yukakin:

—Ja jaki sinatai Jehován jatu maemakin pewaxunxudan, ¿jawaida kain nukun xanen ibujaida anu kushikain yuitanpa?— aka

²⁰jakia Joabin kemakin yuikin:

—Ma nukun xanen ibujaidatun bake mawaxu jaki chanikin datekin min punu nukawai katidumaki. Xaba betsatian kaka betsa bui min ana chanikunkainxanaii. Ikis juni betsa kayutiduki— atan

²¹dabekekaun jawen detenamenika betsa Etiopía nawa yuikin:

—Jaska min uinxu nukun xanen ibujaida jawaida kushikain yuitanwen— aka

Joab bebun ja Etiopía nawa danti ika benitan kushikainaya ²²jawen shinan betsa wakatsi ikama Ahimaasin Joab ana yuikin:

—Jabiaskabiaken ¿Etiopía nawa ichun chibain kushidiakaintanpa?— aka

jakia Joabin kemakin ana yuikin:

—¿Jaskai katanun ika min ea ikai? Ea ninkawe. Min xanen ibu banabimabia jawen manakuti min bitidumaki— aka

²³Ahimaasin kemakin:

—Jaska chanima min ea yuibia ninkamas en ja ichun kushikainaii— aka jawen shinan unankin Joabin yunukin:

—Peki. Chibain kushikaintanwen— aka

panpa anu kushikaini Ahimaasin Etiopía nawa dainbaini ja dukun bebui kaya ²⁴maewan jikiti xui beputi dabe namakis anu David tsauken ja jikiti xui mekenika ja mishki kenebaunibu beputi mamaki mapekekain nixun teskanxun chajaida uinkin juni bestichai kushikidanai bechitan ²⁵jui kushipawen xanen ibu banabima, benimakin xanen ibujaida Davidin yuikin:

—Juni bestichai jukin kakape beikiki— aka ²⁶mekenikatun juni ja kachu kushikidanai uinkin ana jui kushipawen yuikin:

—Juni betsadi kushikidanikiki— aka

xanen ibujaida Davidin ana kemakin:

—Jabiatundi kakape beikiki— aka

²⁷jawen mekenikan ana yuikin:

—Jadi kushikidanai en uinmis en unaiin. Sadocin juni bake Ahimaaski— aka

xanen ibujaida Davidin kemakin yuikin:

—Jadan, juni pepaki. Chanima kakape beikiki— aka

²⁸Ahimaas chaima kematan xanen ibujaida David bebun main beutushitan beti ixun yuikin:

—Unanuma jiwewe. Min xanen ibu mia mebinkatsi ikaibu nuku jatu maemamakin keyuxuwen taexun min xanen ibun min mekenika Dios Jehovah ja besti kenwananwen— aka

²⁹jawen jancha ninkabiakin Davidin jawaida yukakin:

—En bake Absalónan, ¿jaska pe kayamen?— aka

Ahimaasin kemakin yuikin:

—Min tsuma Joabin mia anu ea nichianyan itimaskajaidaibu en ninkabidanxuki. Jakia jaskanxun en unanmaki— aka

³⁰ninkatan xanen ibujaida Davidin yunukin:

—Benikaun ukedi nixun manayuwe— aka

jaska yunua Ahimaas ikaya ³¹jabiatiandi Etiopía nawa jikixun xanen ibujaida David yuikin:

—Xanen ibuun, kaka pepa en mia yuiiai. Ninkawe. Mia pepa waxunkin dasibi miki sinataibun kushipa nemakin jatu maemakin nun keyuxuki— aka

³²Etiopía nawa xanen ibujaida Davidin yukakin:

—En bake Absalónan, ¿jaska pemen?— aka

Etiopía nawan yuikin:

—Miki sinataibu inun min xanen ibu mia mebinkatsis ikaibu inun mia chakabuanun ikaibu ja juni ixu keskai jau ikubainxanunbunwen— aka

³³jawen bake ma mawa unantan juinti metexekei nishmajaidatan mae jikiti xui mamaki dintu betsa manaundi anua kaxanun ika kai tapaitiwen inakainkin yuikin:

—¡En bake Absalón! ¡En bake Absalón! Min xantukun ea en mia mawaxunpanan min mia mawaxuki. ¡En bake Absalón! ¡En bake Absalón!— ikunkaini dintu medan jikia kaxa chakayamaya

19 ¹⁻²David jawen bake mawaxuwen taea nujaidai kaxa chakayamaya Israelin enabu dasibibun ninka keyubaunaibun Joab anu ana kaxun yuiabu ja xabatian detenamei maemananbiakanxu jawen benimatima jatu punu nuka wakin keyuabun ³detenamenikabu betsabudi jatu maemama paxatani beasi dakeyabi jawa benimama june maewan anu jikibidanbidanaibun ⁴David juinti nishmajaidakin jawen besu tadiwen bepukutan bis bis iki kaxakunkainkin: “¡En bake Absalón! ¡En bake Absalón, en bakedan, en bakedan!” iki jeneamaken

⁵janua Davidin dintu anu Joab kaxun yuikin:

—Xanen ibuun, mia inun min juni bakebu inun, min ainbu bakebu inun, min ain betsa betsapabu inun, min esclava ain betsa betsapabu jau mawayamanunbun miki sinataibu nemaxunkin nun mia medabewaxu min jatu dakewaii. ⁶Minabu xanen ibu bexmasbu inun, mia dayaxunmisbu jawa jatukidi shinanma jatu danankin mia tenankatsis ishianbu jatu bestiwen nuikin min jatu bechipaibiai jakia mia bechipaiaibu min jabu danankin dasibibu min ma jatu uinmai, kaxa chakayamakinan. Natian nukubu nun mawanun min nuku yunuti shadaxuki, jau Absalón jiwenunan, jaska min nuiai keska shinankinan. ⁷Xanen ibuun, kaindiwe. Min xanen ibu bexmasbu inun min dayadubu inun min detenamenikabu jabun mia chibanmisbu ikis dasibibu jatu benimawakin jancha pepawen jatu kenwanwen. Min jatu benimawamadan, dasibi paxai na jabia meshu medan juni bestichai mibe bashikuamaki. Jehován nuku ninkaya nadan en mia yubaii. Min jatu ana jaibuwakin benimawama min bakeishtatian taewai jawada chakabu min mekubidani mia anua kain na chakabu eskatian pikujaidai min uiaii— akin jancha kushipawen yui keyua

⁸Jawen jancha ninkatan kaxa nesetan benitan kainkaini ka maewan jikiti xui beputi kexa tsauken: “Xanen ibu David mae jikiti anu ma tsauaki”, itan chanibaunaibu ninkatan David tsaua bebun dasibibun daewai beabu januxun jancha pepawen Davidin jatu ana benimawanikiaki.

Jerusalén anu jau ana xanen ibunun David itanibukiaki, na janchadan

Israelin enabu xukuabun Absalón chibanbiai jatun jiwe tibi anua paxaimabu ⁹jabu Israelin enabu xukuabu tibi anua yudan kaian ja iki yuinamei: “Ja dukun nukuki sinatakin Filisteo nawabun nuku ichakawakubainbiaibun Davidin nuku jatu nemaxunkin jatu tenankin keyuniki. Jakia jawen juni bake Absalónwen datei nukun mai pakea Jene Jordán ukedi David paxai junekainimaki. ¹⁰Xanen ibu wakin jawen bake Absalón nun katubiaimaken detenamekin ma nuku tenananshinabuki. Xanen ibu David jau ana juxanun ¿jawa manakin nun shinain?” iake iakeaibun

¹¹Jaska yuikubainaibun Jene Jordán ukedi Mahanaim anuxundi ninka keyubaunaibun Davidin jiwe anuxundi jabias yuiaibu Davidin ninkatan Diosbe jawenabu janchaxunika dabe Sadoc inun Abiatar anu jawen jancha jatu bumakin Davidin jatu yuikin: “Judán enabu anibu unanepabube janchakin en jancha eska jatu ea yuixunkanwen: ‘En xanen ibui jiwemis anu en ana chintuntidumenkain, xanen ibubube ea janchaxunkanwen.’ ¹²Jabu yuikin: ‘En ana jawaki teatimaki. ¿Jatian man ea iyuai? Jatixuinda en manatidumaki. Matudan, man enabu kayabiki’, akin jatu jancha bumatan ¹³januxun Amasákidi jancha bumakin yuikin: ‘Min en puin bakewen taea nun jabias namiki. Joab xantukun en detenamenikabun min jatun xanen ibu ikunkainxanun en mia katui kakatsi shinaiin. Jaska en mia yubai ninkawe. En mia yubashina en mia akamaken Jehován jau ea kupijaidaxanunwen’ ”, jatu wa Sadoc inun Abiatarin jabias jancha Davidkidi jatu yuixunabu

¹⁴Jaska ninkatan Judán enabun junibu dasibibun shinan betsa watan jabiaskas shinankin jatun jancha Davidkidi yuikin: “Xanen ibu Davidan, jau dasibi jawen xanen ibu bexmasbube Jerusalén anu jau chintundikidanunwen”, ashianbu ¹⁵jaskaken David chintunkidanun ika Jene Jordán pukei juai David ana jaibuwakin beyawakin medabewatanun ika Judán enabu junibu Guilgal anuabu i buaibun ¹⁶Benjamínen enabu betsa Bahurim anua kaini Guerán juni bake Simín Judán enabun ibuabun jatubetan ikin David daewatanun ika jawaida jatube butukainaya ¹⁷jabun chibain 1,000 Benjamínen enabu junibu jabe buaibun jabatiandi Saúlun enabun dayadu mekenika Sibá jawen 15 juni bakebu inun jawen 20 esclavo dayadubube kadiai xanen ibujaida David judiama jabu dukuntun ¹⁸Jene Jordán pukebain xanen ibujaida Davidin enabu inun jatun mabu bexunun ika buxun mabu pewabu kemawatan jene

pukematantankin jaska wakin jatu medabewaya jakidi David pe shinanyan Jene Jordán David pukenun ika kapanan Simí jatun mishki puta puta akima kai David bebun main di ika beuxun datekin ¹⁹yuikin:

—Xanen ibuun, chakabukin en kanejaidaimaki. Jerusalén anua min kainkidanaya en min dayadubia mia chakabuwakin en mia icha icha akima ea shinanma ea jakimaxunwen, ana eki sinatati juneamadan, jaska en mia yukaidan. ²⁰En ibubis chakabuima en unainwen taea Josén enabu inun Israelbu dasibibun mia dananbiaimabun min nukun xanen ibujaida ean dukun mia inun ika en juxuki— akaya ²¹januxun Davidin pui Seruíán juni bake Abisain David yuidiakini:

—Min nukun xanen ibujaida Jehován katuni Simín yupukin mia atimapa waimawen taea ikis na jabatian jau mawanunwen— ikaya ²²jakia Davidin kemakin yuikin:

—Seruíán bakebuun, jaska ja junin kaneimadan, matunamaki. ¿Jaskakin man ea nemaxunkatsis ikai? Israelin enabu dasibi en ana jatu xanen ibuxuni kai ikis en pe shinainwen taea chanima Israelin enabu tsuabuda na xabatian ana mawatidubumaki— jatu watan

²³Simí uinkin yuikin:

—Jhován en shinan unanyan min chakabuimawen taea ikis min mawamaki, en mia yubaidan— akaya

²⁴Janua Mefi-bóset Saúlun bababiaken jawen bake keskakidi shinanmisbu jadi jatubetan ana beyawakin itanun ika kadiai, David paxai taekainaitian Mefi-bóset Davidwen nuijaidai jatian ana jawen yuda jatu mekemama jawen tae ana chukisma inun, jawen kexni ana aisma inun, jawen tadi ana jatu patsamaisma David unanuma chintunkidanaya jawen yuda jawenduama ²⁵Jerusalén anua kainkidan David ma jikia yukatanun ika Mefi-bóset juxun David yukatushia:

—Mefi-bósetiin, ¿jaskai min ebe kama ikimamen, en paxai kayadan?— aka ²⁶jatun daewanun, iwanan, yuikin:

—En xanen ibuun, en dayadun ea padainmaki. Jaki katsuamekaini mibe kanun, iwanan, en asno anu jau ea kabekaxunun en dayadu en yunuimaki, en tae babuwen taexunan. ²⁷Jakia ea axuanmabia mia anu ka ekidi chanichakakin mia padantanimaki. Jaskabiimaken min en xanen ibudan, min Diosun nai tsuma keskawen taexun jaska min pe shinain min axanai. ²⁸En juchi Saúlun mia tenanpai iniwen taea en juchi Saúlun enabu min jatu tenan keyutidubia ewen nuikin min tapu anuxun ea pimakubainkatsi min ea kenatan min ea yubaniki. Jaskawen taexun jawada betsa en mia ana yukatidumaki— aka

²⁹ana jakidi shinanma xanen ibujaida Davidin kemakin yuikin:

—Min juchin basi bai inun yunu bai jau man paxkaxanunbun mia inun Sibá en yunubainmaki. En mikidi shinan betsa wamawen taea jamenmen nun ana janchatidumaki— aka

³⁰jaska wabia Mefi-bósetin ana yuikin:

—Israelin enabu dasibi ana yunukubainxanun ika min jiwe anu jawama unanuma min ana chintuainwen taea miwen besti en benimajaidaiwen taexun Sibán bai dasibi ibuwatiduki— ikaya

³¹⁻³²janua juni betsa jawen kena Barzilai Galaad anua kaini anibujaida 80 badiya basi bai inun yunu betsa betsapa bai ichapa inun dayadu midima jayawen taexun Mahanaim anu David jiweyuaya jawen uxati inun tadi inun yunu inabu betsa betsapa David inun jawenabus inankubainaya atimas Jerusalén anu David kaya nichintanun ika Barzilai jawen mae Roguelim anua butukidan xanen ibujaida David nichin Jene Jordán pukebain kexa betsaudia chintunkidankatsi Barzilain David yuikin:

—En ma kaii— aka ³³jawen jaibu uin jawen nuikin xanen ibujaida Davidin Barzilai yuikin:

—Jerusalén anu ebe kawe. Janu min ebe jiweaya en mia pe mekekubainxanii— aka

³⁴jakia Barzilain kemakin yuikin:

—Min ea pejaida yuibia en xanen ibube Jerusalén anu en katidubia ana jatida badi en jiwetidu jayamaki, ma en mestebuwen taeadan. ³⁵Eadan, en ma 80 año jayaki. Piti inun nuxuti nis meama ma en janpaismaniki. Jaskawen taea nis inun paisma jadatuda en yuitidumaki. Ja dikabi junibu inun ainbuaibu kantaibu xabakabi en ana jatu ninkatidumaki. Jaska kakin min en xanen ibu en mia bika tenematidumaki. ³⁶Mibetan besti Jene Jordán pukebaini en kaii. ¿Jaskakin ja manakuti min ea axunkatsis ikai? Jamenmen en katiduki. ³⁷Ea jaska wama ea jenewe. En mae anua en mawa jau en ibubube ea maiwaxanunbun en kai, ea nemayamawe. Jakia xanen ibuun, dayadu betsa min jayaki, en juni bake Quimhamnan. Mibe kaya jaska min shinain amakin yunukubainxanwen, jau mia ninkanunan— aka

³⁸xanen ibujaida Davidin kemakin yuikin:

—Peki, ja ebe nichinwen. Jawada pepa shinankin min jancha min ea bumaya min bake en axunxanii. Jawada min ea yukai en mia axunxanii— atan

³⁹juni dasibi Jene Jordán pukebainaibun xanen ibujaida David pukekain jatun beyawen taexun Barzilai ikuxun tantsu atan pe nichian jawen mae anu Barzilai chintunkaini atimas jikiaya, ⁴⁰Guilgal anu xanen ibujaida Davidin Quimham iyui kai jikiken Judán enabu detenamenikabu inun Israelin enabu betsabu xukua detenamenikabu namakis jabu paxama niti ikimabu David inun ika Guilgal anudi bunibukiaki. Saúl mawaimaken Hebrón anu Judán enabu yunui David xanen ibui taeaya Israelin enabu 10 xukuabu Jerusalén nortekidi jiwebaunabu ibubis kenai: “Nun Israelin enabu kayabiki, Judán enabu nuku anua ma tadi

paxkabudan, inibuwen taea 10 xukuabu norte jiwebaunabu Israelki”, akin Jerusalén dapi inun surkidi jiwebaunabu: “Judáki”, akin kenakin taewanibukiaki. ⁴¹Guilgal anuxun xanen ibujaida David uinun ika Israel xanen ibubu inun jatun anibu unanepabu dasibi David anu buxun yukakin:

—Mia inun minabus inun jabun mia chibanmisbu jatu ikin Jene Jordán matu pukemai bukin ¿jaskakin nukunabubia nuku juntanbain: “Inun bekanwen”, ikama jatunas mia wai Judán junibun jatun mesti xanen ibuyakanimenkain, min nukun xanen ibudibiakenan?— akaibun

⁴²Judán junibun ninkatan Israelin junibu yuikin:

—Jamenmens man nukuki sinatatidumaki. Jabia nukunabi kayabi nukun xanen ibu nun itanshinaki. ¿Jawawen dabanman man nukuki sinatai? ¿Nun xanenibun piti pishianmen? Jawen jawa nun bishiandaka. Nuku jawa inanmaki— akabu

⁴³ja ikin Israelin junibun kemakin yuikin:

—Matunabubia man jaska shinanmaken nukun xanenibun nuku dasibi mekemiswen taea nukun dukun ikatsi nun shinan taewashinaki, 10 xukua nun matu binuabunan. Matudan, man xuku bestichaiki. ¿Jaskakin man nuku danain? David xanen ibujaidawanun, iwanan, ana iweti shinankin nuku dukuntun nun shinanshinaki, matu dukunmadan— jatu wabu

chanima shinan pewabiai ja ibukuni Israelin junibu binukin jancha kushipawen Judán junibun jatu ja a chakayamanibukiaki.

Sebán jawenabu David jatu jenemabainikiaki, na janchadan

20 ¹Guilgal anuxun Benjamínen enabu juni betsa chakabu Bicrín bake jawen kena Sebán Judán junibun jancha jatu dabanmabainkin David jenemabainkatsi jatube sinatai benikaun jawen trompeta chan chan akin Israelin junibu yuikin: “Chanima Jesén baken Davidin jamapai nun bitidumaki. Israelin junibuun, David jenebaini nukun jiwe anu inun bunankanwen”, jatu wa ²jawen jancha ninkatan David jenebainkin Bicrín bake Sebá chibanbainibun jakia Judán junibu Jerusalén anuabu inun dasibi Jene Jordán kexa anu jiweabun mekebainkin Jerusalén anu David pe iyunibukiaki.

³Janua jawen jiwe ewapa jawendua Jerusalén anu David jikixun jawen 10 nantakea ain dayadubun jawen jiwe jau mekexununbun Davidin jatu jenebainima jiwe betsa anu jau jiwekubainxanunbun Davidin jatu maewa janua jau jabun jatu uinkin pe mekekubainxanunbun jawen detenamenikabu Davidin jatu yunuxun jatuwen nuikin piti inun tadi jatu inanbiakubainkin ana jabu chutama jawen bene ma mawani keskabu tadi jiweabu jatunabun jatu uin jatuki batidubu jiwea jabianua mawakubainibukiaki.

⁴Januxun jawen detenamenika xanen ibu Amasá Davidin kenaxun yunukin:

—Judán junibu dasibi ichawakin jatu yuikubauntanwen. Xaba dabe inun besti kaya jatu ichawabidani jatu iwei juxanwen— aka

⁵jatu ichawatanun ika kashian jati xaba Davidin yunushina binumai judiamawen ⁶taexun Davidin Abisai yuikin:

—Absalónen nuku akima binumakin Sebán nuku chakabujaidawatiduki. Jaskawen taexun en detenamenikabu nenu en jaya jatu iyukin Sebá janun paxai junenun chibantankanwen. Nun jaska wama mae mishki kenebaunibu kushipa betsa betsapa anu jawenabube Sebá paxai jikixun jadi junexun betsa betsapawen chakabuwakin nuku bika tenematiduki— aka

⁷detenamenikabu Joabin yunumis inun, Querete nawabu inun, Pelete nawabu xanen ibujaida David mekemisbu inun jabu detenamae unanjaidaidu jawen betsa Abisain jatu katutan Sebá chibanun ika Jerusalén anu xanen ibu bexmas Abisaibe kainbaini bui ⁸Gabaón anu mishkipanwan daka dapi jikiabun janu Judá junibu jatu itani Amasá jatuki nukuaya, janua Joabin jawen detenameti tadi sawea jawen nanexeketiki machatu chaipa jawen usuntiki usunkin mestenwantan Amasákidi kai jawen machatu chaipa meken yusmaudi jawaida bitan tsumatan ⁹padankin daewanikapaikin Amasá tantsu anun, iwanan, jawen kexni chaipa meken yusiudi tsumatan Joabin yukakin:

—Juchiin, ¿jaska min kai petanai?— aka

¹⁰Joabin jawen machatu chaipa jayama dabanen Amasán jawa shinanma dateamaken Joabin jawaida jawen puku naxtu anu chachikin main di akin ukedi pesa

Amasá main tin ika puku xadabauni itimaskai unanxubida mawaya Joabin ana nameama jawen betsa Abisaibe kai Bicrín bake Sebá chibain buaibun ¹¹Joabin detenamenika betsa Amasán yuda daka dapi nixun beaibu jatu yuikin:

—Tsuanda Joab bechipaikin nukun xanen ibujaida David medabewakatsis ikin Joab chibankubainkanwen— jatu wapakeaya

¹²jakia bai puchinin Amasá jimin iduma mawai dabeakeakeaya ichapa bei Amasá daka anu niti itan uiainbun janua budiabuma Joabin detenamenikan uinkin unantan Amasán yuda xadabain jamaudi bai kexa jana dakaken tadi kextupawen achimatan ¹³jawen yuda ana uianma Sebá achitanun ika Joabbe bukin dainbainbainaubun

¹⁴janua Sebá kai jatu benai Israel xukuabu tibi anu Sebán benakeakebainaya jawen epa Bicrín enabu Sebáki ichabain maewan betsa jawen kena Abel-bet-maacá mishkiwen kenebaunibu anu jabe jikiabu ¹⁵Abel-bet-maacá anu kema anu detenamenikabu ichapa Joabin jatu iyuxun tsua paxatiduma wakín jatu kenebauntan janu

mapekei inun janu butukain pia kuinwen jatu tsakati wakin mai manchinkubainkin kene mati aki kanun jenetan dasibibun mishki kenenibu bedankin main nidi anun ika yubakaibun ¹⁶jawaida mae mishki kenebaunibu anu ainbu unanepa kainkaun nixun “¡Juu!” akin jatu yuikin:

—Ea ninkakanwen. Ewen nuikin ea ninkakanwen. Joabbe en janchakatsis ikai ea yuixunkanwen, jau nedi jununan— jatu wa ¹⁷jatu jaska wa Joab yuiabu date duakabi Joab maewan kenebaunibu anu dapi Joab ka ainbu unanepatun yukakin:

—¿Miadan, min jabiamen, Joabdan?— aka kemakin yuikin:

—Jaa, en Joabki— aka

ainbun ana yuikin:

—En min dayaduwen taexun en jancha ea ninkayuwe— aka kemakin:

—En mia ninkai janchawe— aka

¹⁸jancha wakin yuikin:

—“Na maekidi nukun xenipabun yuikinan, tsuanda ja dukun ja mae chakabuwadiamadan, Abel-bet-maacá jau yukanunbunwen”, jatu wa jaska na mae Abel anu bexun jatun chakabu yukaibu dasibi chakabu pewakin jatu keyuxunkubainikiaki. ¹⁹Nukun maewan Israelin enabun ewa keskaki. Nenu jawama unanuma nun jiwemiski, Jehová chibain chintuanmadan. Nun jaskabiaken nukun maewan yamawanun ixun ¿min nuku jaska wai? ¿Jaskakin Jehován maewanbiaken min yamawakatsis iki ikai?— aka

²⁰Joabin kemakin yuikin:

—Eanan, en jaska shinanmaki. Yamawakin en bedan bedan akatsi ikamaki. ²¹Jaska wakatsi en yubakamaki. Jakia Efraínen enabun mananan mati matipa anua juni bestichai jawen kena Sebádan, nukun xanen ibujaida David jau jenebainunbun jancha chakabukidankin Israelin enabu Sebán jatu yunubidanshinaki. Ja besti chibanbidan achinun ika nun jushianki. Ja ea inankanwen, man ea inanken matun maewan jenebainkin en detenamenikabu en jatu iyuaidan— aka

ainbun kemakin Joab yuikin:

—Peki. Kenebaunibu anuxun jawen buxka nun mianu udeaiin— abain

²²jawenabube ichaxun jawen unanepa janchawen jatu shinan betsa wama Sebá achixun textexun Joab anu Sebán buxka udenxunabu, bixun jawen detenamenikabu jau jenebainunbun jawen trompeta jau chan chan anunbun Joabin jatu yunua chan chan akaibu ninkatan ja maewan jenebaini juni tibi jatun jiwe anu buaibun jawen buxka David uinmanun ika Jerusalén anu Joab chintunkainikiaki.

Davidin xanen ibu bexmasbu jati inibukiaki, na janchadan
(2 S 8.15-18; 1 Cr 18.14-17)

²³Detenamenikabu Israel dasibi yunui Joab xanen ibu ikunkainaya, janua Querete nawabu inun Pelete nawabun jabun David mekemisbu jatun xanen ibudan, Joiadán juni bake Benafas inikiaki. ²⁴Jamen Adoramnan, jatun jatu jamen jatu dayama chakayamakin yunumis jatun xanen ibudi ikunkainikiaki. Xanen ibu David kenexunikadan, Ahiludin juni bake Josafat ikunkainikiaki. ²⁵Jaskakubainaibukidi jabun kaka tibi Seván jatukidi kenekubainaya janua jawenabu Diosbe jatu janchaxunikabu dabe Sadoc inun Abiatar ikubainaibun ²⁶ja mae Jaír anua Irá Diosbe jatu janchaxunikan David medabewakubainikiaki.
